

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI SELASA : 10 NOVEMBER 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 10 HINGGA NO. 56)

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. XAVIER JAYAKUMAR A/L
ARULANANDRAM [KUALA LANGAT]**

TARIKH : 10 NOVEMBER 2020 (SELASA)

SOALAN

Minta **MENTERI TENAGA DAN SUMBER ASLI** menyatakan apakah rancangan Kementerian untuk menyediakan bantuan kepada pengusaha zoo yang menghadapi kemerosotan dari segi ekonomi hingga menyebabkan kebajikan hidupan liar terjejas semasa Perintah Kawalan Pergerakan dilaksanakan.

JAWAPAN

Tuan Yang di-Pertua,

1. Penularan pandemik COVID-19 telah memberi implikasi ke atas kegiatan ekonomi pengendali Zoo dan Pameran Tetap (ZPT) di mana hasil kutipan tiket, jualan-jualan produk dan perkhidmatan yang menjadi sumber pendapatan utama ZPT terjejas sepenuhnya di sepanjang tempoh Perintah Kawalan Pergerakan (PKP).

2. Tindakan-tindakan jangka pendek yang telah dilaksanakan oleh Kementerian Tenaga dan Sumber Asli (KeTSA) melalui Jabatan Perlindungan Hidupan Liar dan Taman Negara (PERHILITAN) bagi memastikan kebajikan hidupan liar di semua ZPT terus terpelihara adalah:

NO. SOALAN : 10

- a) menyediakan peruntukan sebanyak RM10.2 juta di bawah program Dana Prihatin Kebajikan Hidupan Liar kepada premis ZPT yang terjejas. Dana ini bertujuan untuk meringankan bebanan kos operasi ZPT dengan menampung keperluan bekalan makanan hidupan liar, pengurusan husbandri dan ubat-ubatan. Sebanyak 21 ZPT telah mengemukakan permohonan dan dana telah disalurkan secara berperingkat bermula Mei 2020;
- b) mengedar 15 tan barang sitaan Jabatan Perkhidmatan Kuarantin dan Pemeriksaan Malaysia (MAQIS) termasuk daging, sayur-sayuran dan buah-buahan kepada premis ZPT; dan
- c) menyediakan bantuan teknikal kepada ZPT khususnya dalam pengurusan husbandri.

3. Tindakan jangka panjang pula melibatkan penyediaan Model Baharu ZPT dengan kerjasama Malaysian Association of Zoological Park dan Aquaria (MAZPA) dan ZPT. Antara perkara yang diberi penekanan dalam Model Baharu ZPT ialah memastikan ZPT berdaya tahan (*financial sustainability*) dan melaksanakan tadbir urus yang baik. Model Baharu ZPT akan diterima pakai selepas dimuktamadkan.

4. Dalam pada itu juga, pengawalseliaan dan pemantauan terhadap ZPT akan dipertingkatkan bagi memastikan tahap kesihatan dan kebajikan hidupan liar sentiasa terpelihara. Pemantauan juga akan dilaksanakan untuk memastikan ZPT mematuhi Prosedur Operasi Standard (SOP) yang ditetapkan oleh Majlis Keselamatan Negara (MKN) bagi membendung penularan wabak COVID-19.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SHAHARIZUKIRNAIN BIN ABD.
KADIR [SETIU]**

TARIKH : 10 NOVEMBER 2020 (SELASA)

SOALAN

TUAN SHAHARIZUKIRNAIN BIN ABD. KADIR minta **MENTERI KOMUNIKASI DAN MULTIMEDIA** menyatakan sejauh manakah JENDELA (Jalinan Digital Negara) dapat menyelesaikan masalah rangkaian internet luar bandar yang masih belum mendapat 4G seperti di Setiu.

JAWAPAN

Tuan Yang di-Pertua,

Untuk makluman Ahli Yang Berhormat, pihak Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada pembangunan infrastruktur komunikasi melalui penyediaan liputan jalur lebar dengan menggunakan pelbagai teknologi di seluruh negara termasuklah di kawasan Setiu.

Pelan Jalinan Digital Negara atau JENDELA yang telah diumumkan oleh YAB Perdana Menteri, Tan Sri Muhyiddin Yassin pada 29 Ogos lalu adalah merupakan inisiatif Kerajaan dan pemain industri bagi mempertingkatkan tahap kesalinghubungan serta kualiti pengalaman perkhidmatan komunikasi di seluruh negara melalui pembangunan infrastruktur yang lebih cepat dan menyeluruh.

Melalui pelan JENDELA, penambahbaikan infrastruktur digital yang dilaksanakan secara berfasa akan memberikan kualiti pengalaman yang sama rata antara kawasan bandar dan luar bandar.

Sasaran fasa pertama yang telah bermula dan akan berakhir pada tahun 2022 adalah :

- a. penambahan premis yang akan mendapat akses jalur lebar tetap berkelajuan gigabit daripada 4.95 juta premis kepada 7.50 juta premis;
- b. perluasan liputan jalur lebar mudah alih 4G daripada 91.8% kepada 96.9% di kawasan yang berpenduduk; serta
- c. peningkatan kelajuan purata jalur lebar mudah alih daripada 25Mbps kepada 35Mbps.

Di bawah inisiatif JENDELA bagi kawasan Parlimen Setiu, sebanyak hampir 1,322 pelanggan sedia ada akan dinaik taraf dari perkhidmatan rangkaian berasaskan tembaga kepada rangkaian gentian optik untuk jalur lebar talian tetap. Selain daripada itu, sebanyak 13 menara komunikasi baharu telah dirancang untuk dibina dan sebanyak 57 alat pemancar komunikasi di menara sedia ada akan dinaik taraf bagi membolehkan pelanggan mendapat perkhidmatan 4G.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk pemudahcaraan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 10 NOVEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan langkah-langkah yang diambil terhadap pemaju-pemaju yang memberi gambaran yang salah kepada pembeli-pembeli sebagai 'menjual' rumah sedangkan mereka sebenarnya 'menyewa' di bawah skim pajakan swasta seperti di The Meridin @ Medini di Johor Bahru dan tindakan untuk menghentikan amalan tersebut.

JAWAPAN

Tuan Yang di-Pertua,

1. Untuk makluman Yang Berhormat, pemajuan di Medini Iskandar Malaysia ini adalah pemajuan usaha sama di antara pemaju dan Iskandar Investment Berhad (IIB) yang merupakan pemilik tanah di bawah pembangunan Medini Iskandar Malaysia. IIB adalah anak syarikat Khazanah Nasional Berhad yang diberi tanggungjawab untuk membangunkan serta menarik pelaburan-pelaburan luar bagi memenuhi objektif pembangunan Medini Iskandar Malaysia. Kerajaan Negeri Johor telah menganugerahkan tanah di kawasan Medini Iskandar secara pegangan bebas (*freehold*) kepada IIB. Tanah tersebut pula dipajakan melalui perjanjian pajakan selama 99 tahun kepada beberapa pemaju untuk dibangunkan.
2. Pemaju akan menjual unit kediaman yang dimajukan kepada para pembeli melalui kaedah 'pindah milik pajakan' atau 'transfer of lease' dengan menggunakan Borang 15A. Pindah milik tersebut akan dijalankan secara 'interest of land' sahaja melalui pajakan selama 99 tahun. Ini adalah untuk mengelakkan tanah tersebut dimiliki oleh pembeli warga asing selama-lamanya. Justeru, dalam konsep pembangunan Medini Iskandar Malaysia ini, pemilikan tanah akan kekal menjadi milik IIB.
3. Sehubungan itu, pemajuan dan penjualan unit-unit kediaman dalam kawasan Medini Iskandar berbeza dengan pemajuan serta penjualan perumahan biasa kerana konsep penjualan petak di kawasan pemaju hanya melibatkan penjualan petak-petak secara pajakan (*sale of lease*) dan hak milik tanah tidak diserahkan kepada para pembeli kerana akan dikekalkan atas nama pemilik asal iaitu IIB.

4. Ini bermaksud, pembeli tidak mempunyai hakmilik/pemilikan penuh ke atas hartanah/unit rumah yang dibeli tetapi menikmati pindah milik pajakan (*transfer of lease*) tanpa *proprietorship* berdasarkan kepada syarat-syarat pajakan di antara IIB dan pemaju.

5. Oleh itu, Kementerian Perumahan dan Kerajaan Tempatan (KPKT) telah menyesuaikan Perjanjian Jual Beli (PJB) sedia ada mengikut keperluan pemajuan di Medini Iskandar untuk menjaga kepentingan pembeli.

6. Selain itu, bagi memastikan penyelarasan dan menangani implikasi perundangan serta keputusan Mahkamah Tinggi berkaitan isu pemilikan di kawasan Medini Iskandar ini, pihak Jabatan Ketua Pengarah Tanah dan Galian serta Kerajaan Negeri Johor perlu mengkaji dan mempertimbangkan *way forward* dalam memastikan objektif Kerajaan Negeri untuk membangunkan Medini Iskandar berdasarkan konsep dan mekanisme sedia ada adalah praktikal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN ABDUL LATIFF BIN ABDUL
RAHMAN [KUALA KRAI]**

TARIKH : 10 NOVEMBER 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan apakah langkah-langkah Kementerian untuk memastikan rakyat negara ini yang tinggal di kawasan pedalaman Kelantan, Sabah dan Sarawak mendapat bekalan air bersih.

JAWAPAN

Tuan Yang di-Pertua,

Untuk makluman Yang Berhormat, jumlah Projek Bekalan Air Luar Bandar (BALB) Semenanjung di bawah RMKe-11 adalah sebanyak 36 buah projek dengan kos siling keseluruhan adalah sebanyak RM990juta. Daripada jumlah tersebut, sebanyak 10 buah projek adalah Projek Bekalan Air Luar Bandar (BALB) Negeri Kelantan dengan kos siling keseluruhan sebanyak RM240juta. Bagi 10 projek di Negeri Kelantan tersebut, 4 projek telah siap, 5 projek sedang dalam pembinaan dan 1 projek sedang dalam peringkat rekabentuk.

Selanjutnya, bagi pelaksanaan Projek Bekalan Air Luar Bandar (BALB) Sabah di bawah RMKe-11 sebanyak enam puluh tiga (63) buah projek sedang dan akan dijalankan dengan kos keseluruhan adalah sebanyak RM2.04 billion. Daripada enam puluh tiga (63) buah projek tersebut, dua puluh satu (21) projek dalam peringkat pembinaan, tiga puluh lapan (38) dalam peringkat rekabentuk dan empat (4) projek telah siap.

Manakala bagi pelaksanaan Projek Bekalan Air Luar Bandar (BALB) Sarawak, di bawah RMKe-11 sebanyak empat puluh (40) projek sedang dan akan dilaksanakan dengan kos keseluruhan adalah sebanyak RM2.4 billion. Daripada empat puluh (40) projek tersebut, sebelas (11) projek telah siap pembinaan, tiga belas (13) projek adalah dalam peringkat pelaksanaan dan enam belas (16) projek adalah dalam peringkat reka bentuk.

Untuk makluman Yang Berhormat jua,

Selain dari itu, Kementerian juga ada melaksanakan projek-projek bekalan air secara kaedah alternatif seperti telaga tiub, air graviti dan lain-lain kaedah yang bersesuaian bagi kawasan-kawasan pedalaman dan tidak ekonomik untuk dibuat secara retikulasi paip.

Sepanjang RMKe11 sebanyak 19 projek BALB Alternatif telah dilaksanakan di Negeri Kelantan dengan kos keseluruhan sebanyak RM6.7 juta. Bagi Negeri Sabah sebanyak 105 projek BALB Alternatif telah dilaksanakan dengan kos keseluruhan sebanyak RM22.5 juta

manakala bagi Negeri Sarawak sebanyak 53 projek BALB telah dilaksanakan dengan kos keseluruhan sebanyak RM7.4 juta.

Untuk makluman Yang Berhormat selanjutnya, bagi memastikan perancangan dan pelaksanaan projek Bekalan Air Luar Bandar ini berjalan dengan lancar Kementerian sentiasa melakukan libat urus dengan Kerajaan Negeri seperti Unit Perancangan Ekonomi Negeri (UPEN), Pihak Berkuasa Air Negeri (PBAN) dan agensi-agensi negeri bagi memastikan pelaksanaan projek Infrastruktur di Negeri Kelantan, Sabah dan Sarawak berjalan dengan lancar.

Selain daripada itu, Kementerian bersama dengan Kerajaan Negeri Sabah dan Sarawak juga telah menubuhkan tiga(3) jawatankuasa bagi tujuan di atas, iaitu:

- i. Jawatankuasa Induk – dipengerusikan bersama oleh YB Menteri KPLB bersama YAB Ketua Menteri / Timbalan Ketua Menteri;
- ii. Jawatankuasa Bersama – dipengerusikan bersama oleh Ketua Setiausaha KPLB dan Setiausaha Kerajaan Negeri; dan
- iii. Jawatankuasa Teknikal – dipengerusikan bersama oleh Timbalan Ketua Setiausaha (Pembangunan) KPLB bersama Wakil Negeri Sabah / Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TUAN MUHAMMAD BAKHTIAR BIN WAN
CHIK [BALIK PULAU]
TARIKH : 10 NOVEMBER 2020 (SELASA)

SOALAN

Minta **MENTERI PENGAJIAN TINGGI** menyatakan kucar-kacir dan sikap tidak bertanggungjawab mengenai keputusan menghantar balik pelajar-pelajar yang perlu mendaftar secara fizikal di kampus masing-masing yang mengakibatkan NGO dan NGI seperti Ebit Liew terpanggil untuk membantu pelajar-pelajar yang terkandas.

JAWAPAN

Tuan Yang di-Pertua,

Sesi *engagement* bersama pihak-pihak berkepentingan seperti pengurusan universiti telah dilaksanakan oleh kementerian dan pandangan daripada pihak Majlis Keselamatan Negara (MKN) serta Kementerian Kesihatan Malaysia (KKM) juga diteliti terlebih dahulu sebelum keputusan untuk menangguh pendaftaran pelajar baharu sesi akademik 2020/2021 secara bersemuka diambil. Kementerian juga turut memantau secara rapat perkembangan semasa pandemik COVID-19 di dalam negara bagi memastikan sebarang keputusan yang dibuat dapat menjamin keselamatan dan menjaga kebajikan pelajar.

Bagi memastikan urusan pendaftaran dan sesi Pengajaran dan Pembelajaran (PdP) pelajar tidak terjejas berikutan keputusan tersebut, semua urusan berkaitan pendaftaran dan PdP boleh dilaksanakan secara dalam talian. Kementerian turut mencadangkan kepada universiti awam supaya pelajar yang telah berada di kampus dan sedang mengikuti aktiviti akademik, boleh terus kekal berada di kampus masing-masing. Sebagai inisiatif berterusan untuk memastikan maklumat yang tepat dapat disalurkan, Bilik Gerakan di kementerian dan talian *hotline* di universiti-universiti awam terus dibuka bagi menjawab sebarang pertanyaan daripada pelajar, ibubapa, warga IPT, atau masyarakat umum.

Selain itu, kementerian turut bekerjasama dengan syarikat penerbangan dan pengangkutan darat seperti Malaysia Airlines, AirAsia, Malindo Air; FireFly; syarikat-syarikat bas ekspres dan Keretapi Tanah Melayu Berhad (KTMB) bagi menawarkan penjadualan semula pergerakan pelajar tanpa dikenakan sebarang implikasi kos tambahan. Pihak pengurusan universiti awam juga menyediakan insentif kewangan; pemberian pelan data dan peranti secara percuma atau pada harga tawaran istimewa; elaun sara hidup; dan bantuan makanan kepada pelajar berkeperluan. Kementerian turut mengalu-alukan segala sumbangan dan peranan oleh pihak luar termasuk NGO; agensi; syarikat; atau individu untuk tampil sama-sama berganding bahu menghulurkan bantuan kepada pelajar di universiti awam.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 10 NOVEMBER 2020 (SELASA)

SOALAN

DATO' MOHD. NIZAR BIN HAJI ZAKARIA [PARIT] minta **MENTERI KOMUNIKASI DAN MULTIMEDIA** menyatakan :-.

- (a) berapa jumlah kes buli siber yang telah dilaporkan kepada pihak Kementerian; dan
- (b) apakah usaha berterusan yang telah dilaksanakan oleh Kementerian bagi mengekang perbuatan buli siber.

JAWAPAN

Tuan Yang di-Pertua,

Untuk makluman Ahli Yang Berhormat, kesemua aduan yang diterima disusuli tindakan oleh pihak SKMM, termasuklah pemberian nasihat atau panduan kepada pihak yang terkesan, merujuk kepada penyedia platform media sosial yang terlibat untuk penelitian lanjut berasaskan terma perkhidmatan dan piawaian komuniti mereka, serta siasatan terhadap kandungan yang didapati melanggar peruntukan Seksyen 233 Akta Komunikasi dan Multimedia 1998, yang melarang penyebaran kandungan sumbang, lucah, palsu, mengancam atau jelik sifatnya, **dengan niat** untuk menyakitkan hati, menganiayai, mengugut atau mengganggu orang lain. Aduan yang berada di luar bidang kuasa SKMM akan dirujuk kepada agensi penguatkuasaan yang berkenaan, dan bantuan teknikal akan diberikan kepada pihak mereka.

Pihak SKMM telah menerima sebanyak **10,406** aduan awam secara umum yang berkait dengan gangguan atau "*harassment*" (dengan izin) yang dilakukan secara dalam talian, yang merangkumi tetapi tidak terhad kepada buli, gangguan seksual, ancaman, tindakan menakut-nakutkan serta penyalahgunaan maklumat, butiran atau gambar peribadi bagi tujuan penganiayaan dan untuk memalukan atau mengaibkan individu tertentu daripada tahun 2016 sehingga September 2020.

Dalam tempoh tersebut, secara umumnya sejumlah **796** kes berhubung penyalahgunaan media sosial telah disiasat oleh pihak SKMM yang melibatkan kesalahan di bawah peruntukan Seksyen 233 AKM 1998, dan **56** kes daripadanya telah dihadapkan ke mahkamah.

Untuk makluman Ahli Yang Berhormat juga, buli siber merupakan satu ancaman siber yang perlu diberi perhatian oleh semua pihak, terutamanya di kalangan pengguna media sosial. Kawalan sendiri atau *self-regulation* (dengan izin) dengan membudayakan penggunaan internet secara positif berteraskan 3 aspek iaitu keselamatan, kewaspadaan dan tanggungjawab oleh pengguna media sosial adalah

penting bagi melindungi diri sendiri dan juga masyarakat sekeliling daripada paparan kandungan-kandungan berbentuk negatif.

Antara pendekatan proaktif yang digunakan adalah mendidik orang ramai supaya menjadi pengguna platform media sosial yang berhemah menerusi advokasi. Sebagai contoh, pihak Kementerian melalui SKMM dan Cyber Security Malaysia (CSM) telah menggerakkan program kesedaran dan pendidikan bagi memupuk budaya penggunaan secara bijaksana dan berhemah dalam kalangan pengguna media sosial. Program CyberSAFE (Cyber Security Awareness for Everyone), Modul Kesedaran Keselamatan Siber Nasional (MKKSN) dan program advokasi seperti Klik dengan Bijak (KDB), Hentikan Buli Siber dan Berita Palsu giat dilaksanakan bagi mewujudkan masyarakat Malaysia yang bertanggungjawab.

Di samping itu, Kementerian juga telah berkolaborasi dengan Universiti Multimedia (MMU) untuk menjalankan penyelidikan berkaitan undang-undang antibuli siber. Hasil penyelidikan tersebut akan membantu dalam membangunkan rangka kerja sesuai berkaitan mekanisme terbaik bagi menangani isu buli siber, serta dalam merangka undang-undang antibuli siber dengan turut mempertimbangkan prosedur pembebanan bukti, pendakwaan dan sebagainya yang komprehensif serta mempermudah prosedur pendakwaan untuk dibuat ke atas mana-mana pembuli siber.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 10 NOVEMBER 2020 (SELASA)

SOALAN

TUAN CHAN MING KAI [ALOR SETAR] minta **MENTERI KEWANGAN** menyatakan berapa jumlah pemberian tahunan setiap tahun oleh Kerajaan Persekutuan kepada setiap negeri di bawah Perkara 109 Perlembagaan Persekutuan serta asas unjuran terkini yang diguna pakai dalam pengiraan.

JAWAPAN

Tuan Yang di-Pertua,

Kerajaan Persekutuan telah menyalurkan peruntukan berjumlah melebihi RM7.5 bilion setiap tahun bagi membiayai Pemberian kepada negeri-negeri. Formula dan asas pengiraan yang dibuat pula adalah berdasarkan kepada ketetapan di bawah Perlembagaan Persekutuan, Peraturan/ Akta serta keputusan Mesyuarat Jemaah Menteri dan Mesyuarat Majlis Kewangan Negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI HAJI AHMAD BIN HAJI
MASLAN [PONTIAN]**

TARIKH : 10 NOVEMBER 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan program yang sudah dilaksana dan yang dalam perancangan bagi mengurangkan penghijrahan belia dari desa ke kota dan usaha Kementerian agar kehidupan di desa itu menjadi lebih baik.

JAWAPAN

Tuan Yang di-Pertua,

Untuk makluman Yang Berhormat, Kementerian Pembangunan Luar Bandar (KPLB) sentiasa memberi penekanan ke atas usaha meningkatkan kesejahteraan penduduk luar bandar dalam pelbagai aspek meliputi prasarana, ekonomi, sosial dan persekitaran supaya kehidupan di desa menjadi lebih baik dan secara tidak langsung dapat mengurangkan penghijrahan belia dari desa ke kota. Dalam hal ini, pemerksaan belia luar bandar merupakan antara agenda penting di bawah Dasar Pembangunan Luar Bandar 2030 (DPLB 2030). Objektif Teras 5 DPLB 2030, Keunggulan Generasi Belia Luar Bandar adalah untuk membangunkan belia luar bandar supaya bersahsiah tinggi, berilmu, berkemahiran, patriotik, kreatif, inovatif, mengungguli bidang keusahawanan dan mempunyai pendapatan yang mampan.

Program-program yang dilaksanakan bagi mencapai objektif yang telah disebut tadi adalah seperti berikut:

NO. SOALAN : 17

- a) meneruskan penyediaan infrastruktur dan prasarana yang lengkap dan mencukupi di luar bandar dalam menyokong pembangunan ekonomi dan mewujudkan persekitaran luar bandar yang kondusif;
- b) melaksanakan program ekonomi dan keusahawanan iaitu Program Peningkatan Pendapatan (PPP), Skim Pembiayaan Ekonomi Desa (SPED) dan Program Desa Lestari serta program-program di bawah MARA serta Lembaga Kemajuan Wilayah;
- c) menyediakan platform pemasaran secara atas talian melalui aplikasi DesaMall@KPLB;
- d) melaksanakan program pembangunan modal insan seperti Program Latihan Kemahiran dan Kerjaya (PLKK), TVET@KPLB, program-program di bawah KEMAS dan INFRA; dan
- e) melaksanakan pelbagai program seperti Program Pemerkasaan Wanita, Program Keusahawanan dan Pusat Pengumpulan Produk Usahawan Desa di Pusat Komuniti Desa (PKD) yang berfungsi sebagai Pusat Hentian setempat dengan moto Satu Hentian Pelbagai Perkhidmatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 10 NOVEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan jumlah **Penggerak Komuniti Tempatan (PeKT)** yang telah dilantik bersama dengan gred yang terlibat. Apakah fungsi PeKT yang dilantik dan kos yang terlibat.

JAWAPAN

Tuan Yang di-Pertua,

1. Untuk makluman Yang Berhormat, pelaksanaan **Penggerak Komuniti Tempatan (PeKT)** akan melibatkan 3 negeri sahaja iaitu Selangor, Pulau Pinang dan Negeri Sembilan yang merangkumi kawasan 46 buah PBT. Sehingga kini, jumlah PeKT yang telah dilantik dari 3 negeri berkenaan adalah seramai 261 orang.
2. PeKT dilantik dalam kalangan aktivis–aktivis komuniti setempat yang menjalankan pelbagai aktiviti bagi meningkatkan kesejahteraan komuniti setempat. Justeru, PeKT tidak mempunyai gred jawatan tertentu memandangkan ia bukan di bawah klasifikasi perkhidmatan awam.

3. Fungsi-fungsi PeKT seperti berikut:

- 3.1 menyampaikan maklumat kepada penduduk setempat berhubung dasar dan inisiatif di bawah Kementerian Perumahan dan Kerajaan Tempatan (KPKT);
- 3.2 mewujudkan komuniti yang bersatu padu dan berdaya saing melalui aktiviti-aktiviti kesejahteraan bandar dan seterusnya memperkasakan komuniti dan generasi yang lebih mampan;
- 3.3 memantau dan membantu menggerakkan penglibatan komuniti dalam meningkatkan keharmonian komuniti setempat;
- 3.4 menjalankan kegiatan khidmat nasihat bagi memelihara kebersihan, kesihatan dan alam sekitar di sesebuah komuniti; dan
- 3.5 mendapatkan respon dan maklum balas awal komuniti setempat sebelum sesuatu projek atau program dilaksanakan.

4. Bagi tahun 2020, pelaksanaan program adalah selama empat bulan sahaja iaitu mulai September hingga Disember 2020 yang melibatkan peruntukan sebanyak RM2,663,020.00.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN YAMANI HAFEZ BIN MUSA
[SIPITANG]**

TARIKH : 10 NOVEMBER 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan apakah usaha pihak Kementerian dalam usaha meningkatkan pembangunan infrastruktur luar bandar khususnya memberi penumpuan jalan-jalan raya utama di kawasan pedalaman Sabah dan Sarawak.

JAWAPAN

Tuan Yang di-Pertua,

Untuk makluman Yang Berhormat, Kementerian ini mengambil maklum akan keperluan masyarakat luar bandar terutamanya di Sabah dan Sarawak yang masih memerlukan kemudahan infrastruktur khususnya kemudahan jalan raya yang kebanyakannya masih jauh tertinggal dan tiada akses perhubungan. Kementerian ini sentiasa mengadakan perbincangan bersama Kerajaan Negeri dan agensi negeri terlibat bagi memberikan kemudahan infrastruktur yang terbaik khususnya kepada masyarakat luar bandar.

Untuk makluman Yang Berhormat, di bawah Rancangan Malaysia Kesebelas (RMKe-11) bagi tempoh dari tahun 2016 hingga tahun 2020 sebanyak sebanyak 101 projek Jalan Luar Bandar (JALB) telah diluluskan pelaksanaannya di Negeri Sabah yang melibatkan kos keseluruhan berjumlah RM6.05 Bilion. Daripada jumlah tersebut, sebanyak 18 projek sedang dalam peringkat perancangan, 22 projek

NO. SOALAN : 19

dalam perlantikan peruding dan rekabentuk, 7 projek sedang dalam peringkat perolehan, 26 projek dalam pembinaan dan 28 projek telah siap sepenuhnya.

Untuk makluman Yang Berhormat jua, di bawah Rancangan Malaysia Kesebelas (RMKe-11) bagi tempoh dari tahun 2016 hingga tahun 2020 sebanyak sebanyak 58 projek projek Jalan Luar Bandar (JALB) telah diluluskan pelaksanaannya di Negeri Sarawak yang melibatkan kos keseluruhan berjumlah RM3.17 bilion. Daripada jumlah tersebut, sebanyak 41 projek sedang dalam peringkat perlantikan peruding dan rekabentuk, 3 projek sedang dalam peringkat perolehan, 9 projek dalam pembinaan dan 5 projek telah siap sepenuhnya.

Untuk maklumat Yang Berhormat jua, cadangan pelaksanaan projek juga adalah berdasarkan kepada permohonan Senarai Keutamaan Kerajaan Negeri. Perancangan dan cadangan pelaksanaan adalah diterima daripada Kerajaan Negeri Sabah dan Sarawak dengan bantuan agensi teknikal negeri iaitu Jabatan Kerja Raya (JKR) Negeri Sabah dan Jabatan Kerja Raya (JKR) Negeri Sarawak serta agensi teknikal negeri yang lain bagi mendapatkan input dan cadangan projek-projek mendesak.

Cadangan-cadangan projek seterusnya dikemukakan kepada Unit Perancang Ekonomi, Jabatan Perdana Menteri (UPE, JPM) bagi permohonan kelulusan pelaksanaan. Walau bagaimanapun, pelaksanaan projek-projek ini tertakluk kepada kelulusan dan kedudukan semasa kewangan kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TUAN LIM GUAN ENG [BAGAN]
TARIKH : 10 NOVEMBER 2020 (SELASA)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan langkah fiskal untuk mengatasi kadar pengangguran yang meningkat kepada 1 juta orang seperti mana yang disebut oleh YB Menteri Sumber Manusia dan adakah unjuran pertumbuhan ekonomi akan diturunkan untuk mencerminkan kesan gelombang ketiga COVID-19.

JAWAPAN

Tuan Yang di-Pertua,

Pandemik COVID-19 telah menjejaskan aktiviti ekonomi di seluruh dunia termasuk Malaysia. Bagi tujuan membendung penularan serta meminimumkan impak wabak ke atas ekonomi dan kehidupan rakyat, Kerajaan telah melaksanakan Perintah Kawalan Pergerakan (PKP) mulai Mac 2020. Langkah tersebut seterusnya telah mengakibatkan gangguan dalam rantai bekalan dan kemerosotan dalam permintaan agregat. Situasi ini telah menyebabkan industri terutamanya perusahaan kecil dan sederhana (PKS) mengambil langkah-langkah penjimatan kos seperti pengecilan dan penutupan sebahagian besar operasi serta melaksanakan pemberhentian pekerja demi memastikan kelangsungan perniagaan. Ini seterusnya telah menyebabkan bilangan penganggur meningkat dengan ketara daripada 3.9 peratus atau 610,500 orang pada Mac 2020 kepada 5.3 peratus atau 826,100 orang pada Mei 2020.

Sehubungan itu, Kerajaan telah bertindak proaktif dengan melaksanakan pakej rangsangan dan pemulihan ekonomi PRIHATIN dan PENJANA bernilai RM295 bilion yang melibatkan suntikan langsung fiskal berjumlah RM45 bilion untuk memastikan pertumbuhan ekonomi negara terus berdaya tahan dalam mendepani COVID-19. Lanjutan itu, pada 23 September 2020, Kerajaan telah mengumumkan tambahan RM10 bilion di bawah pakej KITA PRIHATIN untuk menambah baik inisiatif sedia ada. Menerusi pakej rangsangan dan pemulihan ekonomi tersebut, antara lain Kerajaan telah melaksanakan beberapa inisiatif penstabilan pekerjaan seperti program-program subsidi upah, pengekalan pekerjaan, insentif pengambilan pekerja, bantuan mobiliti serta program peningkatan kemahiran dan latihan semula, khususnya kepada belia dan siswazah menganggur bertujuan untuk meminimumkan impak COVID-19 ke atas pasaran buruh.

Sehingga 23 Oktober 2020, seramai 428,928 majikan dan 3.6 juta pekerja, belia dan graduan telah mendapat manfaat daripada program-

program tersebut yang melibatkan perbelanjaan peruntukan sebanyak RM13.1 bilion. Justeru, kadar pengangguran telah berkurang kepada 4.7 peratus atau 741,600 orang pada Ogos 2020 dan berkurang lagi kepada 4.6 peratus pada bulan September. Bilangan penganggur dijangka terus berkurangan dalam tempoh beberapa bulan akan datang selaras dengan penerusan pelaksanaan pelbagai inisiatif untuk menstabilkan semula peluang pekerjaan dalam ekonomi.

Tuan Yang di-Pertua,

Susulan daripada kegiatan ekonomi yang telah dibuka kembali pada awal bulan Mei 2020 dan sokongan dasar dalam negeri yang berterusan, ekonomi negara dijangka pulih secara beransur-ansur terutamanya pada separuh kedua tahun 2020 setelah mencatatkan penguncupan mendadak iaitu 17.1 peratus pada suku kedua. Di samping itu, pelaksanaan pakej-pakej rangsangan ekonomi dijangka menyumbang sekitar 4 mata peratusan kepada pertumbuhan KDNK. Secara keseluruhan, ekonomi negara dianggar menguncup 4.5 peratus pada 2020 dan diunjur kembali pulih dalam julat pertumbuhan antara 6.5 peratus hingga 7.5 peratus pada 2021 seperti yang diumumkan semasa pembentangan Belanjawan 2021.

Kerajaan terus komited untuk memulih dan merancakkan semula pertumbuhan ekonomi demi memperkukuh daya tahan negara dalam mendepani sebarang bentuk krisis. Semua inisiatif dan program yang telah diumumkan menerusi pakej rangsangan ekonomi serta Belanjawan 2021 dijangka dapat memastikan pertumbuhan ekonomi yang lebih mampan demi meningkatkan kesejahteraan rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : YB TUAN WONG KAH WOH [IPOH TIMUR]

TARIKH : 10 NOVEMBER 2020 (SELASA)

SOALAN

Minta **MENTERI TENAGA DAN SUMBER ASLI** menyatakan apakah status pembukaan bidaan *Large Scale Solar* 4 (LSS 4) dan apakah rancangan Kementerian untuk memastikan pencapaian 20% penjanaan elektrik sumber tenaga baharu menjelang tahun 2025.

JAWAPAN

Tuan Yang di-Pertua,

Untuk makluman Ahli Yang Berhormat, proses bidaan bagi Program *Large Scale Solar* atau LSS Pusingan Ke-4, yang juga dikenali sebagai LSS@MEnTARI telah dimulakan pada 31 Mei 2020 dan telah ditutup untuk penerimaan tawaran bidaan pada 2 September 2020. Pada masa ini, Suruhanjaya Tenaga sedang melaksanakan proses penilaian dan keputusan bagi LSS@MEnTARI ini dijangka akan diumumkan pada suku pertama tahun 2021.

Berhubung pertanyaan Ahli Yang Berhormat mengenai rancangan Kementerian untuk memastikan pencapaian 20% penjanaan elektrik daripada sumber Tenaga Boleh Baharu (TBB) menjelang tahun 2025, Kementerian saya telah mengkaji semula sasaran 20% TBB yang telah ditetapkan Kerajaan sebelum ini. Mengambil kira perkembangan semasa, satu sasaran TBB yang lebih inklusif telah ditetapkan dan akan diumumkan setelah mendapat kelulusan Jemaah Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI DR. AHMAD ZAHID BIN
HAMIDI [BAGAN DATUK]
TARIKH : 10 NOVEMBER 2020 (SELASA)

SOALAN

DATO' SERI DR. AHMAD ZAHID BIN HAMIDI [BAGAN DATUK] minta **MENTERI KEWANGAN** menyatakan berapa jumlah terkini aset Khazanah Nasional dan apakah terdapat sebarang usaha untuk menjual atau menggabungkan aset-aset yang dimiliki oleh Khazanah Nasional.

JAWAPAN

Tuan Yang di-Pertua,

Khazanah Nasional Berhad (Khazanah) dipertanggungjawabkan untuk membangunkan kekayaan jangka panjang Malaysia. Dalam hal ini, bagi mempelbagaikan (*diversify*) portfolio pelaburan supaya risiko penumpuan (*concentration risk*) dikurangkan, Khazanah telah membahagikan struktur pelaburan kepada dua iaitu Dana Komersial dan Dana Strategik. Objektif khusus kedua-dua dana tersebut adalah seperti berikut:

- i. **Dana Komersial:** Membangunkan aset kewangan dan mempelbagaikan sumber hasil buat negara; dan
- ii. **Dana Strategik:** Memegang aset strategik yang menjamin manfaat ekonomi jangka panjang.

Setakat 31 Disember 2019, Nilai Aset Bersih (*Net Aset Value* atau NAV) bagi Dana Komersial adalah RM73 bilion manakala NAV bagi Dana Strategik pula adalah RM19 bilion.

Secara dasarnya, keputusan untuk menjual, atau melupuskan sesuatu aset tertentu dipertimbangkan sebaik sahaja objektif pelaburan tersebut mencapai sasaran kewangan dan strategiknya. Selain itu, penjualan atau pelupusan aset juga bergantung kepada masa dan kekuatan pasaran serta ketersediaan, kualiti dan kredibiliti pembeli yang bakal mengambil alih aset-aset tersebut. Ini merupakan rasional utama bagi sebarang pelupusan yang dilaksanakan oleh Khazanah.

Memandangkan perkara ini memerlukan kelulusan pihak tertentu termasuk Lembaga Pengarah serta pihak pengawal selia, Khazanah tidak menyatakan secara terperinci mengenai aset-aset yang bakal dilupuskan atau digabungkan pada tahun kewangan semasa baik di dalam mahupun di luar negara, bagi memastikan ia dilaksanakan secara tertib dan teratur serta menurut undang-undang dan peraturan yang ditetapkan, terutamanya transaksi yang berpotensi memberi impak kepada harga saham dan penilaian aset (*market sensitive information*).

Bagi penggabungan aset pula, sebarang transaksi penggabungan harus mampu menjana peningkatan dari segi nilai pegangan bagi pemegang saham termasuk mewujudkan entiti yang lebih besar dan kukuh, serta menghasilkan sinergi yang terbaik dengan mengambil kira kepentingan pemegang saham syarikat masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK WIRA DR. MOHD HATTA BIN
MD RAMLI[LUMUT]
TARIKH : 10 NOVEMBER 2020 (SELASA)

SOALAN

DATUK WIRA DR. MOHD HATTA BIN MD RAMLI [LUMUT] minta **MENTERI KEWANGAN** menyatakan apakah pertimbangan-pertimbangan Kerajaan memberikan bantuan kewangan sebanyak RM1 bilion kepada syarikat penerbangan swasta AirAsia berbanding syarikat penerbangan Malaysia Airlines.

JAWAPAN

Tuan Yang di-Pertua,

Untuk makluman Ahli Yang Berhormat,

Pada masa ini, Kerajaan tidak terlibat dalam apa-apa pelan menyelamatkan (*bail out*) mana-mana syarikat penerbangan komersial termasuk memberi pinjaman atau jaminan kepada Air Asia selaras dengan kenyataan akhbar yang dikeluarkan oleh Kementerian Kewangan pada 13 Oktober 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan adakah Kementerian sedar bahawa masih ramai pelajar dalam negara ini yang tidak mampu memiliki komputer untuk mengikuti program pembelajaran atas talian yang terpaksa dibuat disebabkan oleh pandemik COVID-19. Apakah langkah Kementerian untuk mengatasinya.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan semua murid tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh Perintah Kawalan Pergerakan (PKP) berikutan pandemik COVID-19. KPM sentiasa berusaha menyediakan akses pembelajaran kepada murid secara dalam talian dan luar talian mengikut kesesuaian guru dan murid.

Namun demikian, KPM menyedari masih wujud jurang digital dalam kalangan murid yang terdiri daripada pelbagai latar belakang sosioekonomi, sama ada di kawasan bandar, luar bandar ataupun kawasan pedalaman. Berdasarkan Kajian Kesiediaan Murid dalam Pembelajaran Secara dalam Talian yang telah dilaksanakan pada 28 Mac hingga 2 April 2020, masih terdapat 36.9 peratus murid tidak mempunyai sebarang peranti bagi membolehkan mereka mengikuti pembelajaran

secara dalam talian. Kajian ini melibatkan 670,118 responden yang terdiri daripada ibu bapa kepada 893,331 murid.

Dapatan ini menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti bersesuaian. Di samping itu, terdapat juga kekangan dalam akses kepada internet. Keadaan ini menyebabkan pembelajaran tidak dapat berlaku secara menyeluruh dan seragam kepada semua murid.

Walau bagaimanapun, setelah sekolah dibuka semula secara berperingkat mulai 24 Jun 2020, semua murid dapat kembali berpeluang mengikuti pembelajaran secara bersemuka. Ini membolehkan murid memaksimumkan masa untuk belajar secara bersemuka bagi mencapai tahap penguasaan minimum dalam setiap mata pelajaran atau sebagai persediaan untuk menduduki peperiksaan.

Apabila berlakunya gelombang ketiga pandemic COVID-19, terdapat sekolah yang terpaksa ditutup semula dan murid perlu meneruskan pembelajaran di rumah. Dalam situasi kali ini, didapati murid dan guru lebih bersedia kerana mereka telah mempunyai pengalaman melaksanakan pengajaran dan pembelajaran (PdP) di rumah semasa PKP sebelum ini. Dalam melaksanakan tanggungjawab ini, guru sentiasa komited dan berusaha bersungguh-sungguh untuk memastikan murid tidak ketinggalan dalam pembelajaran.

Sebagai langkah meningkatkan keberkesanan pelaksanaan PdP di rumah, KPM telah menyediakan Manual Pengajaran dan Pembelajaran di Rumah (PdPR). Ini adalah sebagai panduan kepada guru dalam melaksanakan PdP secara berstruktur dan terancang supaya murid dapat mengikuti pembelajaran di rumah dengan optimum. Panduan PdPR ini adalah meliputi pelbagai kaedah PdP yang dapat dilakukan dari rumah secara seperti dalam talian (*online*), luar talian (*offline*) atau *off-site*, menggunakan modul pembelajaran dan berasaskan projek.

Untuk makluman Ahli Yang Berhormat, bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, PdP turut

dilaksanakan melalui siaran TV Pendidikan di saluran TV Okey RTM dan Tutor TV Astro. Di samping itu, terdapat juga guru yang melaksanakan PdP melalui serahan bahan pembelajaran kepada murid dengan pelbagai kaedah mengikut kesesuaian. Murid-murid juga boleh menggunakan buku teks cetak dan buku aktiviti sebagai bahan rujukan dan melaksanakan aktiviti seperti mencatat nota, membuat rumusan atau melukis sesuatu konsep.

Bagi murid yang mengikuti PdP di rumah dan mempunyai peranti serta akses internet pula, KPM menyediakan kemudahan pembelajaran dalam talian melalui platform seperti berikut:

- a) Pelantar pembelajaran digital, iaitu Digital Education Learning Initiative Malaysia (DELIMa). Melalui pelantar ini, murid dan guru boleh akses kepada aplikasi seperti Google Classroom dan Google Meet, Microsoft 365, Apple Teacher Learning Centre, buku teks digital, video PdP, kuiz dan video permainan pembelajaran;
- b) Koleksi video pendidikan melalui pelantar EduwebTV dan CikgoooTube bagi perkongsian koleksi video daya usaha kreativiti guru untuk PdP; dan
- c) Program dan aktiviti seperti kelas digital (*e-class*) untuk murid dan webinar bagi guru.

KPM sedang di peringkat akhir merangka strategi pelaksanaan yang komprehensif dalam memperkasa pendidikan digital negara. Ini termasuklah mengambilkira keperluan pemilikan peranti oleh murid dan juga akses internet di sekolah di seluruh negara. Perkara ini adalah antara butiran yang dinyatakan dalam Belanjawan 2021 yang telah dibentangkan pada 6 November 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan pecahan kaum di Sekolah Kebangsaan, Sekolah Jenis Kebangsaan Cina, Sekolah Jenis Kebangsaan Tamil dan Sekolah Swasta antara tahun 2010 hingga hari ini.

JAWAPAN

Tuan Yang di-Pertua,

Berdasarkan rekod Kementerian Pendidikan Malaysia (KPM), bagi tahun 2010 hingga 2020, trend data menunjukkan peratus penyertaan kaum Melayu di Sekolah Kebangsaan berada pada sekitar 93% hingga 94%. Manakala, peratus penyertaan kaum Cina menunjukkan trend penurunan dari 1.17% pada tahun 2010 kepada 0.73% pada tahun 2020. Peratus penyertaan kaum India juga mencatatkan penurunan daripada 3.15% kepada 2.63% dalam tempoh yang sama. Selain itu, bagi lain-lain kaum, terdapat sedikit peningkatan iaitu daripada 2.00% pada tahun 2010 kepada 2.84% pada tahun 2020.

Bagi Sekolah Jenis Kebangsaan Cina (SJKC), secara keseluruhan, peratus penyertaan kaum Melayu, India dan lain-lain menunjukkan peningkatan pada tahun 2020 berbanding tahun 2010. Trend penyertaan kaum Melayu meningkat daripada 9.15% pada tahun 2010 kepada 15.33% pada tahun 2020. Kaum India juga menunjukkan peningkatan daripada 1.67% kepada 2.75% dalam tempoh yang sama. Begitu juga

dengan penyertaan Lain-lain kaum, meningkat daripada 1.02% pada 2010 kepada 1.67% pada tahun 2020. Namun, peratus penyertaan kaum Cina di SJKC menunjukkan penurunan daripada 88.16% pada tahun 2010 kepada 80.25% pada tahun 2020.

Bagi Sekolah Jenis Kebangsaan Tamil (SJKT) pula, pecahan penyertaan terbesar sepanjang tempoh 2010 sehingga 2020 adalah daripada kaum India, iaitu 99%. Penyertaan bagi kaum Melayu, Cina dan Lain-lain berada kurang daripada 1% sepanjang tempoh berkenaan.

Untuk makluman Ahli Yang Berhormat, bagi sekolah swasta pula, pecahan penyertaan terbesar untuk tahun 2020 adalah daripada kaum Cina iaitu 65.88%, diikuti kaum Melayu termasuk bumiputera Sabah dan Sarawak sebanyak 26.96%, kaum India sebanyak 4.00% dan Lain-lain kaum sebanyak 3.17%. Penyertaan murid kaum Melayu menunjukkan peningkatan sebanyak 0.65% manakala kaum Cina menunjukkan penurunan 0.44% dan kaum India menurun sebanyak 0.21% berbanding tahun 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : Y.B. PUAN HAJAH FUZIAH BINTI SALLEH
[KUANTAN]
TARIKH : 10 NOVEMBER 2020 (SELASA)

SOALAN

PUAN HAJAH FUZIAH BINTI SALLEH [KUANTAN] minta **MENTERI KEWANGAN** menyatakan jumlah yang dibelanjakan di bawah Bajet 2019 berkenaan peruntukan RM60 juta untuk mengganti rugi Kerajaan negeri yang sudah melaksanakan usaha melindungi hutan untuk tujuan pemuliharaan.

JAWAPAN

Tuan Yang di-Pertua,

Untuk makluman, Kementerian Kewangan pada tahun 2019 dan 2020 telah menyalurkan peruntukan berjumlah RM40 juta kepada negeri-negeri yang mengambil usaha melindungi kawasan perlindungan hutan dan marin [*Ecological Fiscal Transfer For Biodiversity Conservation*]. Peruntukan ini merupakan sebahagian daripada Pemberian Tahap Pembangunan Ekonomi, Infrastruktur dan Kesejahteraan Hidup (TAHAP) yang diselaraskan oleh Kementerian Kewangan dan disalurkan terus kepada negeri-negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 10 NOVEMBER 2020 (SELASA)

SOALAN

Minta **MENTERI PENGAJIAN TINGGI** menyatakan sebab mengapa setakat ini tiada penganugerahan 'Tokoh Akademik Negara' untuk tahun 2020 diberi kepada mana-mana ahli akademik.

JAWAPAN

Tuan Yang di-Pertua,

Anugerah Akademik Negara (AAN) merupakan acara tahunan yang mula dianjurkan pada tahun 2006. Inisiatif ini bagi memberikan pengiktirafan tertinggi kepada ahli-ahli akademik yang telah memberikan sumbangan yang signifikan dalam bidang masing-masing. Antaranya bidang penyelidikan dan penerbitan yang berimpak tinggi; penghasilan karya asli yang bermutu; karya seni dan kreativiti terbaik; pengkomersialan produk penyelidikan; serta pengajaran yang cemerlang.

Penularan pandemik COVID-19 sejak bulan Mac yang lalu telah memberikan kesan kepada pelaksanaan semua majlis atau keraian rasmi kerajaan termasuk penganjuran AAN yang dilaksanakan secara berperingkat; terperinci dan memerlukan kehadiran panel dan pemohon secara bersemuka. Kementerian akan mengkaji semula pelaksanaan AAN dengan turut menyuntik elemen-elemen baharu sekiranya situasi pandemik COVID-19 yang melanda negara pada ketika ini telah pulih sepenuhnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' HAJI MOHD. SALIM
SHARIF [JEMPOL]**

TARIKH : 10 NOVEMBER 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan inisiatif yang dilakukan menerusi Program DesaMall@KPLB bagi membantu usahawan luar bandar yang terjejas akibat pandemik COVID-19 untuk meneruskan perniagaan mereka melalui platform dalam talian.

JAWAPAN

Tuan Yang di-Pertua,

KPLB menerusi Program DesaMall@KPLB membantu usahawan untuk memasarkan produk secara dalam talian. Kementerian telah melaksana inisiatif perkongsian strategik dengan pelbagai pihak melalui platform DesaMall@KPLB. Program ini membantu usahawan luar bandar memasarkan produk mereka secara atas talian melalui platform e-Dagang seperti Lazada, Shopee, eBay dan CJ WowShop.

Bermula Januari 2020 sehingga 30 September 2020, Program DesaMall@KPLB telah mencatatkan peningkatan hasil jualan sebanyak 39% berbanding tempoh yang sama pada tahun 2019. Peningkatan hasil jualan tertinggi dicatatkan pada bulan Mei 2020 yang mencatatkan peningkatan hampir 10 kali ganda berbanding bulan-bulan sebelumnya. Peningkatan peratusan hasil jualan ini adalah kesan daripada pembudayaan norma baharu oleh pengguna/ pembeli akibat penularan pandemik CoVid-19.

Dalam usaha untuk menggalakkan lebih ramai pengguna/pembeli membudayakan norma baharu menerusi pembelian secara atas talian, selain memperluaskan pasaran usahawan luar bandar, KPLB telah memulakan kerjasama dengan Grab Malaysia menerusi platform GrabMart bagi memenuhi permintaan *on demand* terhadap pembelian secara atas talian sepanjang tempoh Perintah Kawalan Pergerakan (PKP). KPLB juga akan menganjurkan Karnival Usahawan Desa secara dalam talian (*online*) atau e-KUD@KPLB. Program ini juga bertujuan mewujudkan kesedaran pembeli berkenaan produk usahawan boleh dibeli secara dalam talian. Program ini menyasarkan penglibatan seramai 2,000 usahawan pada Disember 2020.

Sehingga 30 September 2020, seramai 1,748 usahawan luar bandar telah dilatih di bawah program DesaMall@KPLB dan sebanyak 21,698 *Stock Keeping Unit* (SKU) telah dimuatnaik ke dalam platform e-Dagang yang disertai oleh DesaMall@KPLB.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN AHMAD FADHLI BIN SHAARI
[PASIR MAS]**

TARIKH : 10 NOVEMBER 2020 (SELASA)

SOALAN

TUAN AHMAD FADHLI BIN SHAARI [PASIR MAS] minta **MENTERI KOMUNIKASI DAN MULTIMEDIA** menyatakan langkah yang telah diambil oleh pihak Kementerian untuk menaik taraf capaian kelajuan internet di Pasir Mas khususnya kawasan berhampiran sempadan antarabangsa Thailand-Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi. Ini adalah untuk membolehkan rakyat dapat menikmati akses kepada perkhidmatan jalur lebar berkelajuan tinggi yang lebih menyeluruh.

Sehingga kini, terdapat dua (2) menara komunikasi telah beroperasi di kawasan Parlimen Pasir Mas. Namun begitu, bagi menambahbaik liputan sedia ada, sebuah (1) menara komunikasi baharu sedang dalam peringkat pelaksanaan dan dijangka siap secara berperingkat bermula pada suku pertama tahun 2021.

Selain itu, terdapat enam (6) pemancar komunikasi yang telah pun dinaiktaraf ke perkhidmatan jalur lebar mudah alih 4G di Parlimen Pasir Mas. Manakala, di bawah inisiatif Pelan Jalinan Digital Negara (JENDELA), sebanyak tiga (3) pemancar sedia ada telah dirancang untuk dinaiktaraf kepada liputan 4G dan dijangka siap secara berperingkat bermula pada suku pertama tahun 2021.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN TONY PUA KIAM WEE
[DAMANSARA]
TARIKH : 10 NOVEMBER 2020 (SELASA)

SOALAN

TUAN TONY PUA KIAM WEE [DAMANSARA] minta **MENTERI KEWANGAN** menyatakan kedudukan penyelesaian antara kerajaan Malaysia dan Goldman Sachs mengenai kes 1MDB, terutamanya mengenai jumlah pampasan yang telah dibayar dan dijamin oleh Goldman. Adakah pampasan ini akan digunakan untuk membayar hutang 1MDB pada masa yang akan datang.

JAWAPAN

Tuan Yang di-Pertua,

Sebagaimana umum sedia maklum, Kerajaan pada 18 Ogos 2020 telah berjaya memeterai Perjanjian Penyelesaian dengan Goldman Sachs yang telah bersetuju untuk membayar USD3.9 bilion bagi jumlah penyelesaian caj dan tuntutan tertunggak berkaitan dengan tiga urus niaga bon yang telah disusun dan diatur oleh Goldman Sachs untuk 1Malaysia Development Bhd (1MDB).

Penyelesaian ini merangkumi pembayaran tunai USD2.5 bilion dan jaminan untuk pengembalian penuh berjumlah sekurang-kurangnya USD1.4 bilion dari segi aset yang berkait dengan hasil yang telah diseleweng melalui tiga urus niaga bon tersebut.

Pembayaran tunai sebanyak USD2.5 bilion telah diterima sepenuhnya pada 9 September 2020 dan kini disimpan di dalam Akaun Amanah kendalian Kementerian Kewangan.

Selain itu, Goldman Sachs juga, atas biayanya sendiri, akan membantu Kerajaan Malaysia dalam melantik pakar pemulihan aset untuk mendapatkan kembali aset-aset lain yang kini berada di luar Malaysia.

Dana penyelesaian Goldman Sachs ini akan digunakan sepenuhnya bagi tujuan pembayaran hutang 1MDB terutamanya bayaran prinsipal bon berjumlah USD3.5 bilion yang akan matang pada tahun 2022. Di samping itu, penggunaan dana ini untuk membayar hutang 1MDB juga akan dapat mengurangkan tanggungan beban kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 10 NOVEMBER 2020 (ISNIN)

SOALAN

Minta **MENTERI PENGAJIAN TINGGI** menyatakan proses terkini pelaksanaan Program 'Akreditasi Pengalaman Pembelajaran Berasaskan Pengalaman Terdahulu' (APEL) yang diperkenalkan tahun 2016, khasnya di kalangan kumpulan usahawan tani.

JAWAPAN

Tuan Yang di-Pertua,

Kementerian Pengajian Tinggi melalui Agensi Kelayakan Malaysia (MQA) telah memperkenalkan Pengakreditan Pembelajaran Berasaskan Pengalaman Terdahulu (*Accreditation of Prior Experiential Learning*) atau secara ringkasnya dikenali sebagai APEL.A. Inisiatif ini merupakan salah satu laluan kemasukan yang diperkenalkan sejak tahun 2016 bagi membolehkan individu yang berminat tetapi tidak mempunyai kelayakan akademik yang mencukupi untuk menyambung pengajian ke peringkat yang lebih tinggi. Langkah memperkenalkan APEL.A ini adalah sejajar dan menyokong agenda Pembelajaran Sepanjang Hayat (PSH).

Umumnya APEL.A dibuka kepada golongan berkerjaya, sama ada di sektor awam; swasta; mahupun individu yang mempunyai perusahaan sendiri, seperti usahawan tani yang tidak mempunyai kelayakan akademik mencukupi untuk meningkatkan tahap pendidikan dalam bidang kerjaya mereka. Sebagai contoh terdapat calon yang mempunyai Diploma Pertanian yang telah lulus penilaian APEL dan dalam proses untuk melanjutkan pengajian ke peringkat Sarjana.

Individu yang berminat boleh memohon penilaian APEL melalui Portal MQA. Setiap permohonan akan melalui semakan portfolio, ujian aptitud dan temu duga. Sehingga 30 September 2020, MQA telah menerima sebanyak 18,972 permohonan APEL bagi tujuan kemasukan ke pelbagai peringkat pengajian sama ada di peringkat Sijil; Diploma; Sarjana Muda; dan Sarjana di Institusi Pengajian Tinggi (IPT) awam dan swasta.

Sebagai galakan tambahan untuk mereka menyambung pengajian, MQA juga telah memperkenalkan APEL.C. Inisiatif ini membolehkan pindah kredit subjek dalam pengajian diberikan berdasarkan pengalaman kerja. Sebanyak 24 buah institusi pengajian tinggi (IPT) diberikan kebenaran untuk melaksanakan APEL.C dan individu dengan pengalaman kerja boleh memohon pindah kredit subjek sehingga 30% daripada jumlah kredit program pengajian yang diikuti. Kementerian juga turut bersetuju untuk menawarkan pengurangan sebanyak 50 peratus bagi caj penilaian setiap permohonan APEL.A di peringkat sijil dan diploma.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN RUSNAH BINTI ALUAI [TANGGA BATU]

TARIKH : 10 NOVEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan bilakah Kementerian akan menyegerakan langkah mengatasi masalah pencemaran bau dan air limpahan "*leachate*" dari Pusat Pelupusan Sampah di Sungai Udang, Melaka yang semakin serius menjejaskan keselesaan kebajikan dan kepentingan penduduk.

JAWAPAN

Tuan Yang di-Pertua,

1. Untuk makluman Yang Berhormat, masalah limpahan air larut resap (*leachate*) dan pencemaran bau yang berlaku di Tapak Pelupusan Sisa Pepejal Sanitari (TPS) Sungai Udang, Melaka adalah disebabkan sel-sel sedia ada tidak lagi mampu menampung lebihan kapasiti sisa pepejal yang diterima oleh TPS Sungai Udang. Keadaan tapak sel yang tinggi akibat lebihan kapasiti sisa pepejal juga telah menyebabkan kadar serakan bau lebih jauh dan cuaca yang lembab dan basah memudahkan berlakunya perebakan bau ke kawasan sekeliling.
2. Bagi mengatasi perkara ini, Kementerian Perumahan dan Kerajaan Tempatan (KPKT) telah membuat perancangan sewajarnya dengan pembinaan sel baharu yang sepatutnya disiapkan pada 18 Jun 2020. Namun telah berlaku kelewatan dalam pembinaan sel baharu ini disebabkan oleh kerja-kerja di tapak tidak dapat dilaksanakan semasa tempoh Perintah Kawalan Pergerakan (PKP). Walau bagaimanapun, pembinaan sel baharu ini telah dapat disiapkan pada 25 September 2020.
3. Selain itu, KPKT juga telah merancang untuk membina loji rawatan berkonsepkan *waste to energy* (WtE) di Sungai Udang, Melaka. Pada masa kini, KPKT dan Unit Kerjasama Awam Swasta (UKAS) sedang dalam peringkat untuk memuktamadkan penyediaan dokumen *Request for Proposal* (RfP) bagi pembinaan loji rawatan WtE berkenaan. Pembinaan loji rawatan WtE ini akan dapat mengurangkan kuantiti sisa pepejal yang perlu dilupuskan ke tapak pelupusan seterusnya dapat mengatasi isu-isu kebakaran, bau, limpahan air larut resap (*leachate*) dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TUAN LIM LIP ENG [KEPONG]
TARIKH : 10 NOVEMBER 2020 (SELASA)

SOALAN

TUAN LIM LIP ENG [KEPONG] minta **MENTERI KEWANGAN** menyatakan sebab-sebab prestasi pasaran saham tempatan melonjak ketika penularan wabak COVID-19 dan tindakan yang diambil oleh Kerajaan.

JAWAPAN

Tuan Yang di-Pertua,

Untuk makluman Ahli Yang Berhormat,

1. Pandemik COVID-19 telah memberikan tekanan yang besar terhadap ekonomi dan sistem kewangan global. Di sebalik persekitaran global yang mencabar, keseluruhan nilai pasaran ekuiti Malaysia sehingga 30 Oktober 2020 menurun sebanyak RM89.75 billion kepada RM1.62 trilion berbanding RM1.71 trilion pada hujung tahun 2019. Setakat 30 Oktober 2020, Indeks Komposit Kuala Lumpur FTSE Bursa Malaysia (FBMKLCI) menyusut sebanyak 7.7% dipengaruhi oleh ketidaktentuan sentimen sepanjang tahun yang didorong oleh pelbagai peristiwa, serta keuntungan korporat yang suram.

2. Namun demikian, kesan pandemik COVID-19 terhadap pasaran ekuiti diimbangi oleh penyertaan pelabur institusi tempatan (penyertaan sebanyak 50% dari segi nilai) dan pelabur runcit domestik (melebihi 30% dari segi nilai) yang lebih tinggi serta peningkatan yang

memberangsangkan dalam saham yang berkaitan dengan penjagaan kesihatan dan teknologi. Sehingga 30 Oktober 2020, peningkatan nilai sektor penjagaan kesihatan (+218.55%) disokong oleh pembuat sarung tangan dan syarikat farmaseutikal yang terlibat dengan penawaran vaksin, sementara sektor teknologi (+57.45%) mendapat manfaat dari peningkatan penggunaan digital oleh semua lapisan masyarakat semasa berlakunya pandemik COVID-19.

3. Sebagai langkah jangka pendek untuk menyediakan kestabilan dan keyakinan di pasaran saham, Suruhanjaya Sekuriti Malaysia (SC) bersama Bursa Malaysia Berhad (Bursa Malaysia) telah mengumumkan pengantungan aktiviti jualan singkat atau *short selling* untuk sementara waktu sehingga 31 Disember 2020. Selain itu, langkah pengurusan pasaran seperti pemutus litar atau *circuit breaker*, had harga dinamik atau *dynamic price limit* dan statik atau *static price limit* telah juga di kemaskini untuk sementara waktu sehingga 18 Januari 2021. SC dan Bursa Malaysia akan terus memantau aktiviti dagangan dalam situasi yang tidak menentu ini. Institusi-institusi ini akan terus menilai keadaan dan mempertimbangkan langkah-langkah tambahan jika perlu, untuk menyokong pasaran yang teratur.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN YUSUF BIN ABD. WAHAB
[TANJONG MANIS]**

TARIKH : 10 NOVEMBER 2020 (SELASA)

SOALAN

TUAN YUSUF BIN ABD. WAHAB [TANJONG MANIS] minta **MENTERI KOMUNIKASI DAN MULTIMEDIA** menyatakan apakah perancangan untuk menambah baik jaringan telekomunikasi 3G atau 4G di kawasan Sare, Krubong, Mupong, Paloh, Berangan dan Utara Pulau Bruit memandangkan kawasan-kawasan ini selalu menghadapi masalah capaian telekomunikasi dan internet.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi. Ini adalah untuk membolehkan rakyat dapat menikmati akses kepada perkhidmatan jalur lebar berkelajuan tinggi yang lebih menyeluruh.

Sehingga kini, terdapat 19 menara komunikasi yang telah beroperasi manakala sebanyak 21 pemancar telah dinaiktaraf ke perkhidmatan jalur lebar mudah alih 4G di Parlimen Tanjong Manis.

Melalui Pelan Jalinan Digital Negara (JENDELA), sebanyak tujuh (7) alat pemancar komunikasi di menara sedia ada di kawasan Sare, Krubong, Mupong, Paloh, Berangan dan Utara Pulau Bruit telah dirancang untuk dinaiktaraf dengan perkhidmatan 4G. Manakala, satu (1) menara komunikasi baharu juga telah dirancang untuk dibina di Utara Pulau Bruit dan dijangka siap secara berperingkat sehingga tahun 2022.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan apakah sebabnya kes buli di sekolah semakin meningkat dan apa langkah-langkah penyelesaian yang sewajarnya diambil oleh pihak Kementerian, sekolah dan ibu-bapa.

JAWAPAN

Tuan Yang di-Pertua,

Kementerian Pendidikan Malaysia (KPM) memandang serius perkara berkaitan buli dalam kalangan murid dan sentiasa mengambil langkah pencegahan yang sewajarnya. Berdasarkan data Sistem Sahsia Diri Murid (SSDM), peratus murid terlibat gejala buli secara relatif adalah menurun pada tahun 2020 berbanding tahun 2019.

Sepanjang tempoh Januari hingga September 2020, data SSDM menunjukkan 0.04% murid direkodkan melakukan salah laku buli di sekolah berbanding 0.12% kes direkodkan sepanjang Januari hingga November 2019 bagi salah laku yang sama. Peratus murid yang melakukan salah laku buli pada tahun 2016 hingga 2018 adalah masing-masing 0.07%, 0.06% dan 0.09%.

Bagi membendung gejala buli di kalangan murid, KPM sentiasa mengambil langkah proaktif untuk memastikan sekolah bebas dari perbuatan buli. Antara langkah-langkah yang telah dan sedang diambil adalah seperti yang berikut:

- a) melancarkan Program Sekolah Selamat untuk semua sekolah di seluruh negara. Program ini bertujuan mewujudkan persekitaran sekolah yang selamat agar warga sekolah dapat menjalankan aktiviti pengajaran dan pembelajaran serta kegiatan kokurikulum tanpa gangguan dari mana-mana pihak, termasuk perbuatan buli dalam kalangan murid. Antara tindakan yang dilaksanakan dalam program ini adalah menubuhkan Jawatankuasa Khas Sekolah Selamat di peringkat Jabatan Pendidikan Negeri dan Pejabat Pendidikan Daerah serta bekerjasama dengan agensi kerajaan dan bukan kerajaan untuk membantu mempertingkatkan keselamatan di sekolah;
- b) semua pengetua dan guru besar hendaklah memantau dan mengambil langkah proaktif untuk menangani gejala buli dalam kalangan murid sekolah. KPM telah mengeluarkan Surat Pekeliling Ikhtisas Bil. 8 tahun 2010: Garis Panduan Mencegah dan

Menangani Perbuatan Buli Dalam Kalangan Murid di Sekolah dan Buku Panduan Pengurusan Menangani Buli Di Sekolah. Antara tindakan yang perlu diambil oleh pihak sekolah adalah mengadakan peti aduan di sekolah dan asrama, mengukuhkan Jawatankuasa Disiplin Sekolah dan Asrama serta mengambil tindakan dan menghukum murid yang melakukan perbuatan buli di sekolah atau asrama;

- c) mengeratkan hubungan di antara guru dan murid melalui pelaksanaan Amalan Guru Penyayang di sekolah. Program ini bertujuan untuk menerapkan budaya penyayang dalam kalangan warga sekolah, meningkatkan hubungan murid dan guru serta mengeratkan hubungan sesama murid. Usaha ini akan dapat mengurangkan risiko berlakunya kes buli di sekolah;
- d) mengadakan kerjasama erat dengan pihak Polis Diraja Malaysia melalui Pegawai Perhubungan Sekolah (PPS). Setiap sekolah menengah dan sekolah rendah mempunyai seorang PPS yang sentiasa mendampingi dan bekerjasama dengan pihak sekolah, termasuklah mengadakan program-program untuk mencegah perbuatan buli di sekolah; dan
- e) menyediakan khidmat kaunseling kepada murid-murid yang didapati cenderung untuk melakukan perbuatan buli terhadap murid lain.

KPM akan terus berusaha meningkatkan lagi kesedaran murid bagi mencegah gejala buli di sekolah. KPM juga amat menghargai peranan Persatuan Ibu Bapa dan Guru (PIBG), Pertubuhan Bukan Kerajaan (NGO) dan komuniti setempat yang sentiasa bekerjasama dengan pihak sekolah bagi menangani gejala buli dalam kalangan murid.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN R. SIVARASA [SUNGAI BULOH]

TARIKH : 10 NOVEMBER 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan sama ada Kementerian akan melaksanakan tabika elit seperti yang dicadangkan oleh KEMAS baru-baru ini. Bukankah keutamaan pertama Kerajaan untuk membaik pulih ribuan premis tabika KEMAS yang masih dalam keadaan uzur khususnya di Sabah dan Sarawak

JAWAPAN

Tuan Yang di-Pertua,

Untuk makluman Yang Berhormat,

Kementerian melalui KEMAS begitu komited untuk memastikan bangunan TABIKA dan TASKA KEMAS di seluruh negara berada dalam keadaan yang selamat, selesa dan kondusif. Dalam tahun 2020, Kementerian telah memperuntukkan sejumlah **RM8.18 juta** di bawah peruntukan Mengurus dan Pakej Rangsangan Ekonomi (PRE) untuk pelaksanaan baikpulih TABIKA di Sabah dan Sarawak. Peruntukan ini telah memberi manfaat baikpulih kepada sebanyak **252 buah** TABIKA di negeri-negeri berkenaan dan telah memberi manfaat kepada **6,300 orang** kanak-kanak.

Berhubung dengan cadangan pelaksanaan TABIKA Elit, Kementerian tidak bercadang untuk meneruskan cadangan berkenaan namun golongan M40 masih berpeluang untuk menghantar anak mereka ke TABIKA KEMAS jika masih terdapat kekosongan tempat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TUAN OSCAR LING CHAI YEW [SIBU]
TARIKH : 10 NOVEMBER 2020 (SELASA)

SOALAN

TUAN OSCAR LING CHAI YEW [SIBU] minta **MENTERI KEWANGAN** menyatakan bilangan dan jumlah kontrak rundingan terus selepas Perikatan Nasional mengambil alih Kerajaan Persekutuan.

JAWAPAN

Tuan Yang di-Pertua,

Untuk makluman Yang Berhormat,

Perolehan Kerajaan dilaksanakan berdasarkan prinsip perolehan Kerajaan iaitu persaingan terbuka, akauntabiliti awam, ketelusan, nilai faedah terbaik serta adil dan saksama seperti yang digariskan oleh peraturan dan tatacara di dalam Arahan Perbendaharaan dan Pekeliling Perbendaharaan. Walau bagaimanapun, Kerajaan membenarkan pelaksanaan perolehan secara rundingan terus berdasarkan Garis Panduan Permohonan Perolehan Secara Rundingan Terus yang menetapkan permohonan hanya boleh dikemukakan berasaskan lima (5) kriteria khusus seperti berikut:

- i. Kesegeraan atas kepentingan awam di mana sekiranya tidak dilaksanakan segera akan memberi impak negatif kepada penyampaian perkhidmatan awam;

- ii. Bagi maksud penyeragaman untuk memastikan kesesuaian penggunaan (*compatibility*) antara barangan sedia ada dengan barangan baru yang akan dibeli;
- iii. satu punca bekalan/perkhidmatan yang mana hanya satu syarikat sahaja boleh membekalkan barangan/perkhidmatan yang dikehendaki
- iv. melibatkan keselamatan/strategik bagi pembelian alat keselamatan atau projek strategik yang perlu dirahsiakan demi kepentingan negara; atau
- v. kontrak dengan syarikat pembuat Bumiputera yang memenuhi semua syarat kelayakan demi memupuk pertumbuhan syarikat Bumiputera yang bertaraf pembuat

Sejak diperkenalkan mulai tahun 2015, penambahbaikan berterusan telah dilaksanakan terhadap garis panduan ini bagi memastikan ia kekal relevan. Antara penambahbaikan terkini yang telah dilaksanakan mulai tahun 2019 adalah dengan mewajibkan Kementerian/Agensi untuk melaksanakan penilaian terhadap syarikat yang dicadangkan. Ini bagi memastikan hanya syarikat yang benar-benar berkeupayaan dari segi kewangan dan teknikal dipertimbangkan untuk perolehan secara rundingan terus.

Sebagai langkah kawalan, Kementerian/Agensi perlu mengemukakan permohonan perolehan secara rundingan terus berdasarkan kriteria di atas kepada Kementerian Kewangan untuk pertimbangan dan kelulusan sebelum perolehan boleh dilaksanakan. Selain itu, peraturan perolehan Kerajaan juga diperkemaskan melalui surat arahan Kementerian Kewangan bertarikh 29 Jun 2018 yang memansuhkan kaedah perolehan secara tender terhad yang mana dasar ini masih berkuat kuasa sehingga sekarang

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN TAN KOK WAI [CHERAS]

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan kadar keciciran di peringkat sekolah rendah, sekolah menengah dan pendidikan tertiar semasa tempoh pandemik tahun ini.

JAWAPAN

Tuan Yang di-Pertua,

Berdasarkan rekod Kementerian Pendidikan Malaysia (KPM), statistik awal murid cicir di Malaysia pada peringkat rendah bagi tahun 2020 menunjukkan peningkatan, iaitu 0.13 peratus berbanding 0.12 peratus pada tahun 2019. Peratus murid cicir sekolah menengah turut menunjukkan peningkatan iaitu 1.26 peratus dalam tempoh pandemik COVID-19 tahun ini berbanding 1.14 peratus pada tahun 2019.

KPM akan terus melaksanakan pelbagai usaha dalam membendung risiko keciciran murid. Ini adalah bagi memastikan anak-anak generasi masa depan negara dapat mengikuti pembelajaran secara berterusan di sekolah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : YB PUAN YEO BEE YIN [BAKRI]

TARIKH : 10 NOVEMBER 2020 (SELASA)

SOALAN

Minta **MENTERI TENAGA DAN SUMBER ASLI** menyatakan status terkini LSS@MEnTARI. Senaraikan harga tawaran atau "*Offer Price*" dari sepuluh pembida yang terendah untuk Pakej 1 dan 2.

JAWAPAN

Tuan Yang di-Pertua,

Untuk makluman Ahli Yang Berhormat, proses bidaan LSS@MEnTARI yang diumumkan pada 31 Mei 2020 telah ditutup untuk penerimaan tawaran pada 2 September 2020.

Senarai lengkap harga tawaran yang telah diterima daripada semua pembida boleh diperolehi melalui laman sesawang Suruhanjaya Tenaga. Pada masa ini, proses penilaian sedang dilaksanakan oleh Suruhanjaya Tenaga dan sebarang perkembangan terkini akan diumumkan melalui laman sesawang Suruhanjaya Tenaga dari semasa ke semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' DR. XAVIER JAYAKUMAR A/L
ARULANANDRAM [KUALA LANGAT]**

TARIKH : 10 NOVEMBER 2020 (SELASA)

SOALAN

Minta **MENTERI TENAGA DAN SUMBER ASLI** menyatakan Projek pembangunan sistem e-Tanah sepatutnya meningkatkan produktiviti serta memberi kemudahan kepada orang awam berkaitan pengurusan tanah di Pejabat Tanah dan Galian Negeri dan Pejabat Tanah (PTG) dan Daerah (PDT). Apakah faedah dan impak pelaksanaan dan pembangunan sistem ini kepada orang ramai dan Kerajaan.

JAWAPAN

Tuan Yang di-Pertua,

1. Sistem e-Tanah adalah sebuah sistem pengurusan tanah secara digital dan sistematik yang telah dibangunkan oleh Kerajaan Persekutuan untuk kegunaan Pejabat Tanah dan Galian Negeri serta Pejabat Tanah dan Daerah di negeri-negeri Semenanjung Malaysia dan Wilayah Persekutuan. Objektif sistem e-Tanah ini adalah untuk membangunkan dan mendigitalkan sistem pentadbiran tanah elektronik supaya urusan-urusan pentadbiran tanah negeri lebih efektif, telus dan selamat. Pada masa kini, sistem e-Tanah telah dilaksanakan di negeri Pulau Pinang, Melaka dan Kuala Lumpur manakala bagi negeri-negeri lain di Semenanjung Malaysia masih lagi menggunakan Sistem Pendaftaran Tanah Berkomputer (SPTB).

Tuan Yang di-Pertua,

2. Pelaksanaan sistem e-Tanah yang komprehensif dapat meningkatkan kecekapan dalam penyampaian perkhidmatan pentadbiran tanah. Sebagai contoh, sistem ini dapat berintegrasi dengan sistem-sistem di jabatan Kerajaan yang lain seperti Jabatan Pendaftaran Negara, Jabatan Akauntan Negara dan Lembaga Hasil Dalam Negeri yang mana secara tidak langsung dapat mempercepatkan proses di pentadbiran tanah negeri. Selain itu, sistem e-Tanah juga menyediakan kemudahan kaunter setempat (*Single Point of Contact* (SPOC)) untuk kemudahan pelanggan berurusan dengan pelbagai unit dalam suasana yang lebih kondusif dan mempercepatkan masa pelanggan berurusan dengan Pejabat Tanah.

3. Pelaksanaan urusan secara atas talian pula membantu orang awam dan pemain industri untuk melaksanakan transaksi berkaitan tanah dengan lebih cepat dan telus. Urusan-urusan yang dahulunya memerlukan kehadiran ke pejabat tanah dapat diminimalkan. Sebagai contoh, bagi urusan carian persendirian hakmilik, semakan dan bayaran cukai tanah, permohonan pindahmilik, gadaian, tarik balik kaveat, pendaftaran hakmilik dan perserahan urusniaga/ bukan urusniaga strata berkomputer boleh dilaksanakan secara atas talian menerusi sistem e-

Tanah. Ini sekaligus merangsang transaksi dan nilai pasaran hartanah.

4. Peningkatan kecekapan ini seterusnya dapat meningkatkan hasil Kerajaan Persekutuan melalui kutipan hasil duti setem serta hasil kerajaan negeri melalui kutipan cukai dan premium tanah. Selain itu, sistem ini juga mengurangkan ketirisan dalam kutipan hasil Kerajaan dari segi cukai tanah yang tidak berbayar, tunggakan tidak dikemaskini, alamat tidak kemaskini dan lain-lain.

5. Impak pelaksanaan sistem e-Tanah ini dalam jangka panjang ialah meningkatkan keyakinan pelabur berurusan di Malaysia dengan adanya sistem pengurusan tanah cekap dan berkesan. Seterusnya sistem e-Tanah dapat membantu dalam meningkatkan penyampaian perkhidmatan dalam pentadbiran tanah agar selari dengan keperluan dan teknologi semasa serta menambahbaik budaya kerja pentadbiran tanah dimana ianya dapat mengurangkan kerenah birokrasi dan risiko penipuan dalam urusan pentadbiran tanah.

Tuan Yang di-Pertua,

6. Secara keseluruhannya, sistem e-Tanah ini telah membantu memudahkan orang ramai dalam melaksanakan urusan berkaitan hartanah dan menyumbang kepada pembangunan ekonomi. Pelaksanaan sistem e-Tanah ini telah mendapat perhatian di peringkat dunia melalui Laporan *World Bank* pada tahun 2017 dalam penerbitannya bertajuk *Enhancing Public Sector Performance – Malaysia's Experience with Transforming Land Administration*. Selain itu, kedudukan Malaysia pada tahun 2018 bagi *Ease of Doing Business* adalah di tangga 24, dan pada tahun 2019, Malaysia berada di tangga 15 terbaik dunia. Bagi kategori *Registering Properties* pula, pada tahun 2018, Malaysia berada di kedudukan ke-42, dan pada tahun 2019, Malaysia berada di kedudukan ke-29 terbaik dari 190 buah negara dalam urusan pendaftaran hartanah. Antara lain, sistem e-Tanah ini juga telah dianugerahkan sebagai Pemenang Emas dalam kategori Sektor Awam sempena ASEAN ICT Awards bagi tahun 2018

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan adakah Kementerian mempunyai dana kecemasan yang kukuh bagi membantu pelajar-pelajar yang terjejas kebajikan mereka akibat jadual semester yang bertukar-tukar akibat Pandemik COVID-19.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin terhadap kebajikan murid dan pelajar, terutamanya dalam menghadapi situasi yang mencabar akibat pandemik COVID-19.

Untuk makluman Ahli Yang Berhormat, KPM tidak mempunyai dana kecemasan bagi membantu pelajar yang terjejas kerana jadual semester yang bertukar-tukar akibat pandemik COVID-19. Namun demikian, KPM sentiasa memastikan kebajikan pelajar dijaga dan menyediakan pelbagai bantuan apabila pelajar menghadapi kesukaran, khususnya semasa tempoh Perintah Kawalan Pergerakan (PKP) berikutan pandemik COVID-19. Antara bantuan yang telah disediakan adalah keperluan makan dan minum kepada pelajar yang terkandas di kolej atau asrama. Selain itu, KPM juga mengurus dan membiayai tambang perjalanan bagi pelajar yang terlibat untuk balik ke kampung halaman masing-masing. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan sepanjang tempoh 5 tahun kebelakangan ini, berapa jumlah peningkatan pelajar sekolah rendah dan menengah yang terlibat dengan kegiatan penagihan dadah. Adakah bilangan semakin meningkat.

JAWAPAN

Tuan Yang di-Pertua,

Kementerian Pendidikan Malaysia (KPM) memandang serius perkara berkaitan penglibatan murid dengan kegiatan penagihan dadah. Sehubungan itu, KPM sentiasa berkerjasama rapat dengan Agensi Antidadah Kebangsaan (AADK) dan Polis Diraja Malaysia (PDRM) untuk mengenal pasti murid yang terlibat dengan gejala dadah. Antaranya, melalui Program Ujian Saringan Urin AADK di peringkat sekolah menengah dengan pemilihan murid secara rawak.

Untuk makluman Ahli Yang Berhormat, berdasarkan data yang direkodkan dalam program ujian urin AADK dari tahun 2016 hingga September 2020, terdapat trend penurunan bilangan murid sekolah menengah yang positif ujian urin dan dikategorikan mencuba dadah. Pada tahun 2016, sebanyak 3.8 peratus atau 1,506 daripada 39,647 orang murid yang telah disaring adalah didapati positif dadah. Namun,

peratusan ini telah menurun kepada 2.9 peratus atau 1,243 daripada 42,865 orang murid yang telah disaring pada tahun 2019. Bagi tahun ini pula, iaitu sehingga September 2020, didapati 2.9 peratus atau 422 daripada 14,563 orang murid sekolah menengah yang disaring adalah positif dadah.

KPM akan terus berkerjasama dengan semua pihak untuk melaksanakan Program Pendidikan Pencegahan Dadah di sekolah dan program intervensi yang bersesuaian bagi murid yang terlibat. KPM amat menghargai peranan ibu bapa dan masyarakat dalam usaha mewujudkan persekitaran sekolah bebas daripada dadah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. WAN AZIZAH WAN ISMAIL
[PANDAN]**

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan jurang pendidikan dan pembelajaran antara pelajar-pelajar berkemampuan dan pelajar-pelajar dari keluarga mudah terjejas semakin ketara apabila persekolahan semakin memerlukan akses internet dan komputer. Apakah usaha Kementerian untuk memastikan pelajar-pelajar tidak terus ketinggalan dalam pendidikan masing-masing.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan semua murid dapat mengikuti pembelajaran secara menyeluruh dan seragam. Namun demikian, KPM menyedari masih wujud jurang digital dalam kalangan murid yang terdiri daripada pelbagai latar belakang sosioekonomi, sama ada di kawasan bandar, luar bandar ataupun kawasan pedalaman.

Dalam hal ini, KPM telah menjalankan Kajian Kesediaan Murid dalam Pembelajaran Secara dalam Talian pada 28 Mac hingga 2 April 2020 dan melibatkan 670,118 responden yang terdiri daripada ibu bapa kepada 893,331 murid. Dapatan kajian menunjukkan masih terdapat 36.9 peratus murid tidak mempunyai sebarang peranti bagi membolehkan mereka mengikuti pembelajaran secara dalam talian.

Dapatan ini juga menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti bersesuaian. Di samping itu, terdapat juga kekangan dalam akses kepada internet. Keadaan ini menyebabkan pembelajaran tidak dapat berlaku secara menyeluruh dan seragam kepada semua murid.

Untuk makluman Ahli Yang Berhormat, KPM sentiasa berusaha untuk memastikan semua murid mendapat akses pembelajaran, termasuk juga murid daripada keluarga mudah terjejas. Bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, pengajaran dan pembelajaran (PdP) turut dilaksanakan melalui siaran TV Pendidikan di saluran TV Okey RTM dan Tutor TV Astro. Di samping itu, terdapat juga guru yang melaksanakan PdP melalui serahan bahan pembelajaran kepada murid dengan pelbagai kaedah mengikut kesesuaian. Murid-murid juga boleh menggunakan buku teks cetak dan buku aktiviti sebagai bahan rujukan dan melaksanakan aktiviti seperti mencatat nota, membuat rumusan atau melukis sesuatu konsep.

Bagi murid yang mengikuti PdP di rumah dan mempunyai peranti serta akses internet pula, KPM menyediakan kemudahan pembelajaran dalam talian melalui platform seperti berikut:

- a) Pelantar pembelajaran digital, iaitu Digital Education Learning Initiative Malaysia (DELIMA). Melalui pelantar ini, murid dan guru boleh akses kepada aplikasi seperti Google Classroom dan Google Meet, Microsoft 365, Apple Teacher Learning Centre, buku teks digital, video PdP, kuiz dan video permainan pembelajaran;
- b) Koleksi video pendidikan melalui pelantar EduwebTV dan CikgooTube bagi perkongsian koleksi video daya usaha kreativiti guru untuk PdP; dan
- c) Program dan aktiviti seperti kelas digital (*e-class*) untuk murid dan webinar bagi guru.

Sebagai langkah meningkatkan keberkesanan pelaksanaan pengajaran dan pembelajaran (PdP) di rumah, KPM telah menyediakan Manual Pengajaran dan Pembelajaran di Rumah (PdPR). Ini adalah sebagai panduan kepada guru dalam melaksanakan PdP secara berstruktur dan terancang supaya murid dapat mengikuti pembelajaran di rumah dengan optimum. Panduan PdPR ini adalah meliputi pelbagai kaedah PdP yang dapat dilakukan dari rumah secara seperti dalam talian (*online*), luar talian (*offline*) atau *off-site*, menggunakan modul pembelajaran dan berasaskan projek.

KPM sedang di peringkat akhir merangka strategi pelaksanaan yang komprehensif dalam memperkasa pendidikan digital negara. Ini termasuklah mengambilkira keperluan pemilikan peranti oleh murid dan juga akses internet di sekolah di seluruh negara. Perkara ini adalah antara butiran yang dinyatakan dalam Belanjawan 2021 yang telah dibentangkan pada 6 November 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 10 NOVEMBER 2020 (SELASA)

SOALAN

PUAN ALICE LAU KIONG YIENG [LANANG] minta **MENTERI KEWANGAN** menyatakan bilangan projek rundingan terus yang diluluskan oleh kerajaan Barisan Nasional pada tahun 2013-2018 dan projek rundingan terus yang diluluskan oleh Kerajaan Pakatan Harapan dari 2018-Februari 2020 serta projek rundingan terus yang diluluskan oleh Kerajaan Perikatan Nasional sejak 1 Mac 2020 hingga 31 Oktober 2020. Senaraikan nama projek, kontraktor, Kementerian dan peruntukan yang terlibat secara terperinci.

JAWAPAN

Tuan Yang di-Pertua,

Untuk makluman Yang Berhormat,

Perolehan Kerajaan dilaksanakan berdasarkan prinsip perolehan Kerajaan iaitu persaingan terbuka, akauntabiliti awam, ketelusan, nilai faedah terbaik serta adil dan saksama seperti yang digariskan oleh peraturan dan tatacara di dalam Arahan Perbendaharaan dan Pekeliling Perbendaharaan. Walau bagaimanapun, Kerajaan membenarkan pelaksanaan perolehan secara rundingan terus berdasarkan Garis Panduan Permohonan Perolehan Secara Rundingan Terus yang menetapkan permohonan hanya boleh dikemukakan berasaskan lima (5) kriteria khusus seperti berikut:

- i. Kesegeraan atas kepentingan awam di mana sekiranya tidak dilaksanakan segera akan memberi impak negatif kepada penyampaian perkhidmatan awam;
- ii. Bagi maksud penyeragaman untuk memastikan kesesuaian penggunaan (*compatibility*) antara barangan sedia ada dengan barangan baru yang akan dibeli;
- iii. satu punca bekalan/perkhidmatan yang mana hanya satu syarikat sahaja boleh membekalkan barangan/perkhidmatan yang dikehendaki
- iv. melibatkan keselamatan/strategik bagi pembelian alat keselamatan atau projek strategik yang perlu dirahsiakan demi kepentingan negara; atau
- v. kontrak dengan syarikat pembuat Bumiputera yang memenuhi semua syarat kelayakan demi memupuk pertumbuhan syarikat Bumiputera yang bertaraf pembuat

Sejak diperkenalkan mulai tahun 2015, penambahbaikan berterusan telah dilaksanakan terhadap garis panduan ini bagi memastikan ia kekal relevan. Antara penambahbaikan terkini yang telah dilaksanakan mulai tahun 2019 adalah dengan mewajibkan Kementerian/Agensi untuk melaksanakan penilaian terhadap syarikat yang dicadangkan. Ini bagi memastikan hanya syarikat yang benar-benar berkeupayaan dari segi kewangan dan teknikal dipertimbangkan untuk perolehan secara rundingan terus.

Sebagai langkah kawalan, Kementerian/Agensi perlu mengemukakan permohonan perolehan secara rundingan terus berdasarkan kriteria di atas kepada Kementerian Kewangan untuk pertimbangan dan kelulusan sebelum perolehan boleh dilaksanakan.

Selain itu, peraturan perolehan Kerajaan juga diperkemaskan melalui surat arahan Kementerian Kewangan bertarikh 29 Jun 2018 yang memansuhkan kaedah perolehan secara tender terhad yang mana dasar ini masih berkuat kuasa sehingga sekarang

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA , PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJI MOHD. ANUAR
MOHD. TAHIR [TEMERLOH]**

TARIKH : 10 NOVEMBER 2020 (SELASA)

SOALAN

Minta **MENTERI TENAGA DAN SUMBER ASLI** menyatakan apakah inisiatif Kementerian untuk mengekang aktiviti pencerobohan dan kecurian sumber alam seperti pencerobohan hutan, mineral, pasir dan pemburuan haram dari terus berleluasa dengan penggunaan teknologi '*state of the art*' seperti drone, remote sensing, Light Detection and Ranging (LIDAR) dan seumpamanya.

JAWAPAN

Tuan Yang di-Pertua,

1. Kementerian Tenaga dan Sumber Asli (KeTSA) melalui Jabatan-jabatan Perhutanan Negeri komited untuk mengekang aktiviti pencerobohan dan kecurian sumber alam seperti pencerobohan hutan dari terus berleluasa. Antara usaha yang sedang dijalankan dengan menggunakan teknologi yang terkini adalah seperti berikut:

- (i) Penggunaan aplikasi Sistem *Forest Monitoring Using Remote Sensing Plus 5* (FMRS+5) bagi mengesan perubahan litupan kawasan hutan. Sistem ini disokong dengan penggunaan dron yang memberi gambaran kawasan secara *real time*, *Geographical Information System* (GIS) dan *Global Positioning System* (GPS);
- (ii) Penubuhan Pusat Pemantauan Sumber Hutan Negara yang beroperasi 24 jam di Ibu Pejabat Jabatan Perhutanan Semenanjung Malaysia dalam pemantauan kesalahan hutan. Pusat ini berupaya untuk mengesan sebarang perubahan yang berlaku di dalam HSK akibat aktiviti pencerobohan dan penerokaan hutan, pembalakan haram, perubahan litupan hutan dan insiden kebakaran hutan; dan
- (iii) melaksanakan inisiatif *Continuous Monitoring of Surveillance* (COMOS) yang dibangunkan oleh Jabatan Hutan Sarawak untuk membekalkan maklumat risikan yang lebih cepat dan tepat mengenai kemungkinan berlaku pembalakan haram di sesuatu kawasan.

Tuan Yang di-Pertua,

2. Dalam era norma baharu, penggunaan teknologi geospacial termasuk *drone* dan *remote sensing* akan meningkatkan keberkesanan tugas pemantauan dan penguatkuasaan. Ini termasuklah menggunakan aplikasi terkini seperti *Spatial Monitoring And Reporting Tool-Connect* (SMART).

3. Jabatan PERHILITAN juga telah memasang perangkap kamera *Multimedia Messaging Service* (MMS) di pintu-pintu masuk kawasan *hotspot* pemburuan haram bagi mendapatkan maklumat kemasukan pemburu haram ke kawasan berkenaan. Imej real time pemburu haram akan dihantar terus ke telefon bimbit sekiranya pemburu melalui perangkap kamera MMS tersebut. Penguatkuasaan di lokasi akan dilaksanakan sebaik sahaja apabila isyarat diterima oleh perangkap kamera MMS.

Tuan Yang di-Pertua,

4. Aktiviti kawal selia untuk mengekang kecurian sumber asli seperti mineral dan bahan batuan dijalankan oleh Kementerian Tenaga dan Sumber Asli melalui Jabatan Mineral dan Geosains (JMG). Penguatkuasaan di bawah Akta Pembangunan Mineral 1994 meliputi aktiviti perlombongan, pemprosesan mineral, pengangkutan dan pengumpulan (stockpiling). Selain itu, penguatkuasaan enakmen mineral negeri-negeri turut mempunyai peranan bagi memastikan tiada sebarang aktiviti yang berkaitan pengeluaran sumber mineral secara tidak sah.

5. Kementerian Tenaga dan Sumber Asli juga dalam usaha untuk menyelaraskan penguatkuasaan kedua-dua perundangan ini supaya saling melengkapi antara satu sama lain dan dapat memantapkan langkah-langkah penguatkuasaan dan kawal selia aktiviti perlombongan mineral. Usaha ini memerlukan kerjasama antara JMG dengan agensi Negeri seperti Pejabat Tanah dan Galian (PTG) Negeri dan Pentadbir Tanah dan Daerah (PTD) dalam menjalankan operasi bersepadu.

6. JMG juga bekerjasama dengan agensi-agensi Persekutuan lain seperti Jabatan Ukur Dan Pemetaan Malaysia (JUPEM) dan Malaysian Space Agency (MYSA) untuk memastikan keberkesanan tindakan kawal selia.
7. Sebagai contoh, JMG telah menggunakan drone dengan bantuan JUPEM dalam mengenalpasti kuantiti stokpil mineral bauksit di Kuantan, Pahang. Bantuan MySA pula diperolehi melalui teknologi remote sensing di mana sebarang aktiviti pencerobohan dapat dikenalpasti sekiranya terdapat perubahan guna tanah di luar kawasan yang diluluskan untuk aktiviti perlombongan.
8. Untuk masa akan datang, pengukuhan kawal selia di bawah JMG dijalankan dengan perolehan 3 unit drone sebagai salah satu alat untuk membantu dalam pemantauan operasi perlombongan dengan skala yang lebih meluas.
9. Dimaklumkan juga bahawa bagi aktiviti pengorekan pasir di Pelantar Benua iaitu kawasan lautan selepas tiga (3) batu nautika daripada tikas air surut adalah tertakluk kepada kelulusan lesen yang dikeluarkan oleh Kerajaan Persekutuan melalui Kementerian Tenaga dan Sumber Asli merujuk kepada Seksyen 4, Akta Pelantar Benua 1966.
10. Bagi memantau dan mengekang pelanggaran syarat pengorekan pasir ini, semua kapal pasir yang beroperasi dilengkapi dengan Sistem *Dredging and Dumping Management System* (DDMS) yang boleh mengesan kedudukan dan pergerakan kapal-kapal tersebut.
11. Mana –mana kapal yang dikesan tidak mengaktifkan sistem ini atau melakukan pengorekan pasir di luar kawasan konsesi akan didakwa di bawah Akta Pelantar Benua 1966.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan kesan pandemik COVID-19 terhadap pendidikan murid-murid Tahun 1 hingga 6, dan apakah langkah-langkah Kementerian untuk mengatasi masalah jurang pembelajaran (*learning gap*) ini.

JAWAPAN

Tuan Yang di-Pertua,

Kesan pandemik COVID-19 kepada sektor pendidikan melibatkan pelbagai pihak berkepentingan, merangkumi lebih 5 juta orang murid dan pelajar serta lebih 500,000 orang guru, pensyarah dan warga Kementerian Pendidikan Malaysia (KPM). Antara kesan langsung kepada murid, termasuk murid Tahun 1 hingga Tahun 6, adalah penutupan semua sekolah selama hampir 4 bulan berikutan pelaksanaan Perintah Kawalan Pergerakan (PKP) mulai bulan Mac 2020.

Dalam tempoh penutupan sekolah semasa PKP, sesi pengajaran dan pembelajaran (PdP) kepada semua murid tidak dapat dilaksanakan secara bersemula. Oleh demikian, KPM telah menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid. Sekolah telah dibuka semula sepenuhnya pada bulan Julai 2020 dan murid mengikuti pembelajaran secara bersemuka.

Sebagai langkah meningkatkan keberkesanan pelaksanaan PdP di rumah, KPM telah menyediakan Manual Pengajaran dan Pembelajaran di Rumah (PdPR). Ini adalah sebagai panduan kepada guru dalam melaksanakan PdP secara berstruktur dan terancang supaya murid dapat mengikuti pembelajaran di rumah dengan optimum. Panduan PdPR ini adalah meliputi pelbagai kaedah PdP yang dapat dilakukan dari rumah secara seperti dalam talian (*online*), luar talian (*offline*) atau *off-site*, menggunakan modul pembelajaran dan berasaskan projek.

Untuk makluman Ahli Yang Berhormat, bagi membantu kumpulan murid, termasuk murid Tahun 1 hingga Tahun 6 yang tidak mempunyai akses kepada talian internet dan alat peranti yang sesuai untuk pembelajaran secara dalam talian, PdP turut dilaksanakan melalui siaran TV Pendidikan di saluran TV Okey RTM dan Tutor TV Astro. Di samping itu, terdapat juga guru yang melaksanakan PdP melalui serahan bahan pembelajaran kepada murid dengan pelbagai kaedah mengikut kesesuaian.

Murid-murid juga boleh menggunakan buku teks cetak dan buku aktiviti sebagai bahan rujukan dan melaksanakan aktiviti seperti mencatat nota, membuat rumusan atau melakar sesuatu konsep dengan lebih jelas. Bagi murid yang mengikuti PdP di rumah dan mempunyai peranti serta akses internet pula, KPM menyediakan kemudahan pembelajaran dalam talian melalui platform seperti berikut:

- a) Pelantar pembelajaran digital, iaitu Digital Education Learning Initiative Malaysia (DELIMa). Melalui pelantar ini, murid dan guru boleh akses kepada aplikasi seperti Google Classroom dan Google Meet, Microsoft 365, Apple Teacher Learning Centre, buku teks digital, video PdP, kuiz dan video permainan pembelajaran;
- b) Koleksi video pendidikan melalui pelantar EduwebTV dan CikgooTube bagi perkongsian koleksi video daya usaha kreativiti guru untuk PdP; dan
- c) Program dan aktiviti seperti kelas digital (*e-class*) untuk murid dan webinar bagi guru.

KPM sedang di peringkat akhir merangka strategi pelaksanaan yang komprehensif dalam memperkasa pendidikan digital negara. Ini termasuklah mengambilkira keperluan pemilikan peranti oleh murid dan juga akses internet di sekolah di seluruh negara. Perkara ini adalah antara butiran yang dinyatakan dalam Belanjawan 2021 yang telah dibentangkan pada 6 November 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 10 NOVEMBER 2020 (SELASA)

SOALAN

Minta **MENTERI PENDIDIKAN** menyatakan keputusan terkini selepas mengkaji semula kelulusan Pembukaan Institusi Baharu (PIB) bagi SMJK Heng Ee 2, Pulau Pinang yang telah diluluskan oleh Jemaah Menteri Kerajaan Pakatan Harapan (PH).

JAWAPAN

Tuan Yang Di-Pertua,

Mesyuarat Jemaah Menteri pada 22 Januari 2020, telah meluluskan permohonan pembukaan institusi baharu (PIB) bagi premis SMK Heng Ee 2, Bayan Baru, Pulau Pinang dengan pentadbiran tersendiri. Walau bagaimanapun, keputusan tersebut hanya dibuat di bawah agenda hal-hal lain di mana tiada Memorandum Jemaah Menteri yang memperincikan perkara ini dibentangkan kepada Jemaah Menteri.

Oleh yang demikian, KPM akan mengemukakan Memorandum Jemaah Menteri berhubung perkara ini untuk penelitian dan pertimbangan semula kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SIM CHEE KEONG
[BUKIT MERTAJAM]**

TARIKH : 10 NOVEMBER 2020 (SELASA)

SOALAN

TUAN SIM CHEE KEONG [BUKIT MERTAJAM] minta **MENTERI KOMUNIKASI DAN MULTIMEDIA** menyatakan perincian Pelan Pelaksanaan Gentian Optik dan Kesalinghubungan Negara (The National Fiberisation and Connectivity Plan) di Sabah dan Sarawak, rancangan mengikut daerah, dan garis masa projek-projek.

JAWAPAN

Tuan Yang di-Pertua,

Untuk makluman Ahli Yang Berhormat, berikutan pandemik COVID-19 yang melanda negara dan seluruh dunia amnya pada masa kini, perubahan norma baharu pasca COVID-19 telah menyaksikan perubahan ketara corak penggunaan Internet oleh masyarakat. Maka, bagi mempertingkatkan tahap kesalinghubungan serta kualiti pengalaman perkhidmatan komunikasi di seluruh negara, satu pelan untuk menambah baik infastruktur digital yang dikenali sebagai Jalinan Digital Negara atau JENDELA telah dibangunkan dengan mengambil perancangan yang telah ada dan telah diumumkan oleh YAB Perdana Menteri, Tan Sri Muhyiddin Yassin pada 29 Ogos lalu.

Di bawah inisiatif pelan JENDELA melalui dana Pemberian Perkhidmatan Sejagat (PPS), bagi negeri Sabah, sebanyak 382 menara baharu dan 924 alat pemancar komunikasi sedia ada telah dirancang dengan perkhidmatan 4G dan akan dibuat secara berperingkat dari tahun 2020 sehingga 2022 seperti senarai lokasi jadual di bawah.

Perancangan Menara Baharu		
Bil	Daerah	Jumlah Menara
1	Beaufort	9
2	Beluran	52
3	Keningau	24
4	Kinabatangan	29
5	Kota Belud	6
6	Kota Kinabalu	2
7	Kota Marudu	33
8	Kuala Penyu	5
9	Kudat	14
10	Kunak	3
11	Lahad Datu	14

Perancangan Menara Baharu		
Bil	Daerah	Jumlah Menara
12	Nabawan	23
13	Papar	4
14	Penampang	6
15	Pitas	8
16	Putatan	1
17	Ranau	26
18	Sandakan	6
19	Semporna	12
20	Sipitang	2
21	Tambunan	13
22	Tawau	16
23	Tenom	15
24	Tongod	26
25	Tuaran	27

Perancangan Penaiktarafan Alat Pemancar		
Bil	Daerah	Jumlah Menara
1	Beaufort	46
2	Beluran	73
3	Keningau	81
4	Kinabatangan	66
5	Kotabelud	18
6	Kota Kinabalu	2
7	Kota Marudu	38
8	Kuala Penyu	22
9	Kudat	27
10	Kunak	29
11	Lahad Datu	122
12	Nabawan	28

Perancangan Penaiktarafan Alat Pemancar		
Bil	Daerah	Jumlah Menara
13	Papar	7
14	Penampang	2
15	Pendalaman	31
16	Pitas	29
17	Ranau	60
18	Sandakan	25
19	Semporna	16
20	Sipitang	43
21	Tambunan	25
22	Tawau	55
23	Tenom	32
24	Tongod	36
25	Tuaran	11

Manakala bagi negeri Sarawak pula, sebanyak 636 menara baharu dan 1,043 alat pemancar komunikasi sedia ada telah dirancang dengan perkhidmatan 4G dan tempoh pelaksanaan juga adalah dari tahun 2020 hingga 2022.

Perancangan Menara Baharu		
Bil	Daerah	Jumlah Menara
1	Asajaya	3
2	Bau	9
3	Belaga	17
4	Beluru	29
5	Betong	12
6	Bintulu	6
7	Bukit Mabong	23
8	Dalat	6

Perancangan Menara Baharu		
Bil	Daerah	Jumlah Menara
9	Daro	6
10	Julau	21
11	Kabong	6
12	Kanowit	9
13	Kapit	19
14	Kuching	13
15	Lawas	13
16	Limbang	32
17	Lubok Antu	25
18	Lundu	7
19	Maradong	12
20	Marudi	22
21	Matu	5
22	Miri	2
23	Mukah	18
24	Pakan	19
25	Pusa	2
26	Samarahan	3
27	Saratok	13
28	Sarikei	16
29	Sebauh	23
30	Selangau	19
31	Serian	18
32	Sibu	23
33	Simunjan	15
34	Song	16
35	Sri Aman	13
36	Subis	14
37	Tanjung Manis	1

Perancangan Menara Baharu		
Bil	Daerah	Jumlah Menara
38	Tatau	17
39	Tebedu	10
40	Telang Usan	96

Perancangan Penaiktarafan Alat Pemancar		
Bil	Daerah	Jumlah Menara
1	Asajaya	4
2	Bau	46
3	Belaga	23
4	Beluru	19
5	Betong	47
6	Bintulu	27
7	Bukit Mabong	6
8	Dalat	7
9	Daro	14
10	Julau	14
11	Kabong	17
12	Kanowit	23
13	Kapit	15
14	Kuching	24
15	Lawas	35
16	Limbang	42
17	Lubok Antu	21
18	Lundu	57
19	Maradong	20
20	Marudi	17
21	Matu	10
22	Miri	25
23	Mukah	49

Perancangan Penaiktarafan Alat Pemancar		
Bil	Daerah	Jumlah Menara
24	Pakan	13
25	Pusa	12
26	Samarahan	4
27	Saratok	24
28	Sarikei	44
29	Sebauh	17
30	Selangau	27
31	Serian	62
32	Sibu	29
33	Simunjan	27
34	Song	9
35	Sri Aman	104
36	Subis	49
37	Tanjung Manis	10
38	Tatau	22
39	Tebedu	18
40	Telang Usan	10

Untuk makluman Ahli Yang Berhormat juga, jumlah pembinaan menara baharu dan penaiktarafan alat pemancar sedia ada kepada liputan 4G ini akan disesuaikan dari semasa ke semasa. Tambahan pula terdapat juga inisiatif penambahbaikan perkhidmatan talian tetap dan mudah alih yang akan dilaksanakan secara komersial oleh pihak pemberi perkhidmatan dalam tempoh yang sama.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk pemudahcaraan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TENGKU ZULPURI BIN RAJA PUJI [RAUB]

TARIKH : 10 NOVEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan usaha-usaha yang diambil oleh Kementerian dalam menyediakan kemudahan rumah mampu milik kepada rakyat.

JAWAPAN

Tuan Yang di-Pertua,

1. Untuk makluman Yang Berhormat, antara usaha sedia ada Kementerian Perumahan dan Kerajaan Tempatan (KPKT) dalam menyediakan kemudahan rumah mampu milik (RMM) kepada rakyat adalah melalui pelaksanaan program dan skim perumahan seperti berikut:

- (a) **Program Perumahan Rakyat (PPR) Dimiliki** yang menawarkan rumah PPR berharga RM35,000 seunit di Semenanjung Malaysia dan RM42,000 seunit di Sabah/Sarawak kepada pembeli rumah pertama daripada golongan B40 berpendapatan isi rumah di bawah RM3,000 sebulan;
- (b) **Skim Perumahan Mampu Milik Swasta (MyHome)** yang menawarkan insentif sebanyak RM30,000 bagi pembeli rumah pertama daripada kalangan B40 dan M40 yang berpendapatan isi rumah di bawah RM10,000 sebulan; dan
- (c) **Rumah Mesra Rakyat (RMR) di bawah Syarikat Perumahan Negara Berhad (SPNB)** di mana pemohon yang berkelayakan dan memiliki tanah sendiri boleh memohon program RMR untuk membina rumah dengan harga RM75,000 hingga RM106,500 dengan subsidi Kerajaan berjumlah RM20,000, manakala baki RM55,000 hingga RM86,500 dibiayai melalui pinjaman yang ditawarkan oleh SPNB dengan bayaran balik ansuran yang lebih rendah.

2. Selain itu, terdapat juga program perumahan lain di bawah KPKT yang memberi keutamaan kepada pembeli rumah pertama seperti berikut:

- (a) Perumahan Penjawat Awam Malaysia (PPAM) yang merupakan program khusus kepada penjawat awam dalam kalangan B40 dan M40 untuk memiliki rumah dengan harga yang lebih rendah dari harga pasaran; dan
- (b) Perumahan PR1MA yang menawarkan perumahan kepada golongan B40 dan M40 berpendapatan isi rumah di bawah RM15,000 sebulan untuk memiliki rumah.

3. Untuk makluman Yang Berhormat juga antara **inisiatif sewaan perumahan** oleh KPKT terutamanya di bandar-bandar besar utama adalah melalui program berikut:

- (a) **PPR Disewa** yang menawarkan rumah PPR dengan kadar sewaan RM124 sebulan kepada pemohon yang berkelayakkan daripada golongan B40 berpendapatan isi rumah di bawah RM3,000 sebulan;
- (b) **Rumah Transit** menawarkan rumah sewa pada kadar RM250 sebulan kepada pasangan muda baharu berkahwin; dan
- (c) **Rumah Transit Belia** yang menawarkan rumah secara sewaan pada kadar sewaan sebanyak 20%-30% lebih rendah daripada harga pasaran di samping menyediakan *forced savings* kepada penyewa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DATUK MOHD AZIS BIN JAMMAN
[SEPANGGAR]
TARIKH : 10 NOVEMBER 2020 (SELASA)

SOALAN

DATUK MOHD AZIS BIN JAMMAN [SEPANGGAR] minta **MENTERI KEWANGAN** menyatakan adakah Kerajaan bercadang untuk melaksanakan semula moratorium secara automatik kepada rakyat Sabah memandangkan kehidupan dan pendapatan mereka terjejas teruk sejak gelombang ketiga COVID-19 melanda Sabah.

JAWAPAN

Tuan Yang di-Pertua,

1. Kerajaan telah memberikan moratorium ke atas pinjaman bank selama 6 bulan sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Selepas tamat tempoh moratorium tersebut pada September 2020, industri perbankan telah melanjutkan moratorium pinjaman secara bersasar dan memberikan fleksibiliti pembayaran balik pinjaman kepada golongan yang benar-benar terjejas akibat wabak COVID-19, seperti individu yang kehilangan pekerjaan atau individu serta perniagaan yang mengalami pengurangan pendapatan.
2. Bagi individu dan PKS dalam sektor yang masih terjejas, industri perbankan telah memberikan komitmen untuk membantu peminjam tersebut. Para peminjam hanya perlu memberi maklum balas kepada pihak bank serta memberikan sedikit maklumat yang diperlukan untuk mengesahkan status mereka.
3. Daripada lebih 640,000 peminjam yang memohon untuk bantuan, lebih 98% telah mendapat bantuan pelbagai. Selain itu juga, sejak Oktober didapati lebih 85% peminjam telah memulakan semula membayar balik pinjaman mereka.
4. Penduduk Sabah yang terkesan teruk oleh COVID-19 masih boleh mendapat bantuan di bawah program Moratorium Lanjutan dan Bantuan Bank Bersasar ini. Institusi perbankan telah memberi komitmen bahawa mereka akan meluluskan permohonan peminjam yang memerlukannya. Selain itu, seperti yang diumumkan dalam Belanjawan 2021, kesemua golongan individu B40 yang merupakan penerima BSH (atau bakal penerima BPR) dan pengusaha perniagaan mikro dengan hutang tidak melebihi RM150,000 akan mendapat moratorium automatik mulai Disember 2020. Mereka hanya perlu membuat pilihan samada inginkan penangguhan bayaran selama 3 bulan atau pengurangan bayaran 50% selama 6 bulan. Ini dijangka membantu lebih 8.1 juta rakyat Malaysia. Peminjam M40 juga dapat menikmati beberapa penambahbaikan bantuan

bayaran pinjaman bank ini. Mereka hanya perlu membuat pengisytiharan sendiri kepada bank masing-masing.

5. Orang ramai tidak perlu bimbang kerana fleksibiliti yang diberikan kepada peminjam sepanjang tempoh ini tidak akan terpapar dalam laporan Sistem Maklumat Rujukan Kredit Pusat (atau CCRIS) peminjam.

6. Peminjam individu dan PKS yang mempunyai pinjaman dengan beberapa bank atau sekiranya permohonan bantuan pembayaran balik pinjaman mereka ditolak, boleh meminta bantuan Agensi Kaunseling dan Pengurusan Kredit (atau AKPK) bagi menyemak semula permohonan mereka dan menyediakan pelan pinjaman yang sesuai dengan bank mereka.

7. Sekiranya masih belum berpuas hati, peminjam juga boleh menghubungi BNM TELELINK di talian 1300 88 5465 atau e-mel bnmtelelink@bnm.gov.my untuk membuat sebarang aduan terhadap bank-bank berhubung dengan permohonan bantuan bayaran balik pinjaman mereka.

Tuan Yang Di-Pertua,

8. Pelbagai saluran telah disediakan untuk memudahkan pelanggan memohon bantuan pembayaran balik pinjaman. Antaranya:

- a. Membuat permohonan melalui atas talian; dan
- b. Mendapatkan perkhidmatan cawangan tertentu dilanjutkan pada hujung minggu.

9. Selain itu, agensi BNM, AKPK dan institusi perbankan akan menganjurkan beberapa lagi siri Kempen Pembayaran Balik Pinjaman setelah mendapat respon yang baik melalui kempen yang diadakan di 12 lokasi di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN LARRY SOON @LARRY SNG
WEI SHIEN [JULAU]**

TARIKH : 10 NOVEMBER 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan adakah Kerajaan bercadang memperkenalkan mekanisme baru yang akan memudahkan penyampaian bantuan kepada rakyat yang tinggal kawasan luar bandar dan pedalaman dalam berhadapan dengan pandemik COVID-19.

JAWAPAN

Tuan Yang di-Pertua,

Untuk makluman Yang Berhormat, Mesyuarat Khas Menteri-Menteri Bil.8 Tahun 2020 mengenai pelaksanaan Perintah Kawalan Pergerakan bertarikh 26 Mac 2020 memutuskan bahawa Jabatan Kemajuan Masyarakat (JKM) di bawah Kementerian Pembangunan Wanita, Keluarga dan Masyarakat bertanggungjawab memberi bantuan bekalan makanan kepada rakyat Malaysia yang hilang pendapatan dan memerlukan bantuan dalam tempoh pelaksanaan Perintah Kawalan Pergerakan.

Selain itu, JKM juga telah diberi tanggungjawab untuk menyelaras sumbangan makanan termasuk sumbangan daripada Pertubuhan Bukan Kerajaan (NGO)/ Badan Korporat/ Syarikat Swasta dan Individu sepanjang PKP dengan kerjasama pemimpin tempatan, Jabatan Sukarelawan Malaysia (RELA) dan Angkatan Pertahanan Awam Malaysia (APM). Semua pihak, termasuk pemimpin

masyarakat boleh mengemukakan aduan dan rujukan sekiranya dikenal pasti ada pihak memerlukan bantuan kepada JKM yang berhampiran untuk disampaikan bantuan tersebut.

Sebanyak **RM47.42 juta** telah diperuntukan bagi menampung program bantuan bekalan makanan semasa PKP iaitu Bantuan Bakul Makanan **Fasa I, RM5.68 juta, Fasa II RM9.06 juta, Fasa III RM 10.48 juta** melalui peruntukan Tabung COVID-19. Manakala RM 22.2 juta peruntukan daripada Kementerian Kewangan bagi menampung Bakul Makanan B40 Kawasan Parlimen.

Selain daripada itu, terdapat juga sumbangan-sumbangan keperluan asas dan bekalan makanan daripada (NGO)/ Badan Korporat/ Syarikat Swasta dan Individu juga menyumbang dalam pemberian bakul makanan semasa PKP. Keseluruhan penerima bantuan Bakul Makanan di seluruh negara adalah seramai **820,723 Ketua Isi Rumah (KIR)** dan memberi manfaat kepada **3.2 Juta Ahli Isi Rumah (AIR)**.

Dalam masa yang sama, Kementerian Pembangunan Luar Bandar melalui Jabatan Kemajuan Orang Asli (JAKOA) juga terlibat dalam pengagihan Bakul Makanan kepada masyarakat Orang Asli. Pengagihan bakul makanan yang melibatkan kerjasama bersama kepimpinan pengurusan kampung iaitu Tok Batin dan juga Jawatankuasa Pembangunan dan Keselamatan Kampung Orang Asli (JPPKOA). Selain itu, JAKOA turut melibatkan penguatkuasa tempatan, Unit Udara Jabatan Bomba dan Penyelamat Malaysia, Angkatan Pertahanan Awam Malaysia, Jabatan Sukarelawan Malaysia (RELA), Polis Diraja Malaysia(PDRM), Angkatan Tentera Malaysia (ATM) dan badan bukan kerajaan untuk pengagihan bakul makanan kepada masyarakat Orang Asli termasuk di kawasan pedalaman.

Pengagihan bakul makanan ini melibatkan 165,087 Ketua Isi Rumah Orang Asli dengan perbelanjaan sebanyak RM18,817,040.00.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TUAN GOBIND SINGH DEO [PUCHONG]
TARIKH : 10 NOVEMBER 2020 (SELASA)

SOALAN

TUAN GOBIND SINGH DEO [PUCHONG] MINTA MENTERI KEWANGAN menyatakan apakah inisiatif-inisiatif yang diambil oleh Kerajaan untuk mengukuhkan perniagaan dalam tahun ini khususnya selepas wabak COVID-19. Huraikan semua dana yang diketepikan buat perkara ini apakah tujuannya dan pelaksanaannya sehingga sekarang.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan melalui pakej-pakej rangsangan ekonomi PRIHATIN, PRIHATIN PKS Tambahan, PENJANA dan terkini KITA PRIHATIN, telah memperkenalkan pelbagai inisiatif bagi mengukuh, mengupaya dan melonjakkan perniagaan yang sedang berhadapan dengan cabaran ekor pandemik COVID-19. Bantuan dan inisiatif dirangka bagi menangani isu-isu yang dihadapi sektor perniagaan seperti berikut:

- i. Bagi mengurangkan kos operasi dan meningkatkan aliran tunai perniagaan, Kerajaan telah melaksanakan inisiatif yang antaranya seperti berikut:

- a. Moratorium ke atas pinjaman oleh sektor perniagaan bagi tempoh April sehingga September 2020 dengan nilai sebanyak RM35 bilion. Kini, Kerajaan telah bersetuju memberikan lanjutan moratorium dan bantuan bank bersasar kepada peminjam Perusahaan Kecil dan Sederhana (PKS) yang masih terkesan akibat pandemik Covid-19 ini;
 - b. Program Subsidi Upah (PSU) di bawah PRIHATIN telah diberikan kepada majikan untuk tempoh 3 bulan bermula April sehingga Jun 2020. Di bawah PENJANA, PSU telah dilanjutkan selama 3 bulan lagi bermula Julai sehingga September 2020. Terkini, PSU telah dilanjutkan sekali lagi di bawah pakej KITA PRIHATIN seperti yang diumumkan pada 23 September 2020. Sehingga 16 Oktober 2020, sebanyak RM11.9 bilion subsidi upah telah disalurkan kepada lebih 322 ribu majikan dan melibatkan lebih 2.6 juta pekerjaan;
 - c. Pemberian diskaun sehingga 15% bagi penggunaan elektrik dalam kategori perdagangan, perindustrian dan pertanian. Sehingga 16 Oktober 2020, nilai diskaun adalah sebanyak RM460 juta dan dimanafaat oleh sebanyak 1.45 juta perniagaan; dan
 - d. Geran Khas Prihatin (GKP) kepada setiap PKS mikro yang berkecukupan akan diberi bantuan kewangan tunai secara *one-off* sebanyak RM3,000. Sehingga 16 Oktober 2020 jumlah penyaluran GKP adalah berjumlah RM1.63 bilion yang memberi manfaat kepada hampir 545 ribu PKS mikro.
- ii. Bagi menyediakan akses kepada pembiayaan untuk PKS, Kerajaan telah memperkenalkan program pembiayaan seperti berikut:
- a. Kerajaan turut memperkenalkan Pembiayaan PKS PENJANA bernilai RM2 bilion bagi membantu memulihkan PKS yang terjejas untuk memulakan semula perniagaan;

- b. Skim Pembiayaan Mikro Kredit Bank Simpanan Nasional dan TEKUN Nasional di bawah PRIHATIN dan PENJANA dengan peruntukan sebanyak RM1.1 bilion;
- c. Kemudahan Pembiayaan Pelancongan PENJANA dengan dana bernilai RM1 bilion bagi membantu PKS dalam sektor pelancongan;
- d. Program pembiayaan Bumiputera berjumlah RM500 juta untuk disalurkan melalui dua agensi iaitu Perbadanan Usahawan Nasional Berhad dan MARA;
- e. Pembiayaan kredit mikro kepada usahawan tani sebanyak RM350 juta di bawah AgroBank; dan
- f. Melalui Bank Negara Malaysia pula, Kerajaan telah menyediakan beberapa dana pembiayaan *Soft Loans* kepada PKS seperti *Special Relief Facility* (SRF), *All Economic Sector Facility* (AES), *Agrofood Facility* (AF) dan *Automation and Digitalisation Facility* (ADF).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN TEH KOK LIM [TAIPING]

TARIKH : 10 NOVEMBER 2020 (SELASA)

SOALAN

TUAN TEH KOK LIM [TAIPING] minta **MENTERI KEWANGAN** menyatakan rancangan Kerajaan dalam menangani kejatuhan kutipan hasil untuk tahun 2020 ketika negara berdepan melawan pandemik COVID-19 serta kejatuhan harga minyak mentah sedunia.

JAWAPAN

Tuan Yang di-Pertua,

1. Kerajaan telah mengumumkan unjuran jumlah hasil Kerajaan Persekutuan bagi tahun 2020 sebanyak RM244.5 bilion semasa pembentangan Belanjawan 2020, dengan andaian harga minyak mentah dunia Brent USD62 setong. Namun, krisis pandemik COVID-19 telah memberi impak yang besar kepada kedudukan kewangan Kerajaan Persekutuan. Berdasarkan situasi semasa, anggaran hasil dijangka mengalami pengurangan sekitar 20% berikutan unjuran Keluaran Dalam Negeri Kasar (KDNK) yang lebih rendah dan paras harga terkini minyak mentah dunia yang masih rendah sekitar USD41 setong (tempoh Januari hingga 23 Oktober 2020). Selain itu, hasil Kerajaan turut terkesan dengan pelaksanaan inisiatif percukaian termasuk pengecualian cukai dan penangguhan bayaran cukai perniagaan dalam sektor pelancongan yang diperkenalkan di bawah pakej rangsangan dan pemulihan ekonomi susulan penularan pandemik COVID-19. Anggaran terkini hasil Kerajaan Persekutuan tahun 2020 telah disemak kepada RM227.3 bilion, berkurang sebanyak RM17.2 bilion daripada anggaran asal.

2. Antara langkah yang akan diambil Kerajaan untuk menangani kekurangan hasil termasuk menambahbaik strategi kutipan hasil dengan membasmi aktiviti penyeludupan terutama barangan berduti tinggi, serta perolehan dividen tambahan daripada entiti Kerajaan. Bagi tempoh jangka sederhana dan panjang pula, Kerajaan akan kembali melaksanakan langkah konsolidasi fiskal dan inisiatif pengukuhan kedudukan fiskal kerajaan termasuk meneroka sumber-sumber hasil baharu, meluaskan asas percukaian, mengukuhkan pentadbiran dan pematuhan cukai, mengurangkan ketirisan di samping meningkatkan kecekapan perbelanjaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : PUAN KASTHURIRAANI A/P PATTO
[BATU KAWAN]
TARIKH : 10 NOVEMBER 2020 (SELASA)

SOALAN

Minta **MENTERI PENGAJIAN TINGGI** menyatakan di era pembelajaran di atas talian, apakah bentuk bantuan yang telah dan akan diberikan oleh Kerajaan kepada keluarga B40 yang tidak berkemampuan untuk membeli laptop atau melanggan internet, lebih-lebih lagi bagi yang menerima surat tawaran untuk memasuki politeknik, sekolah vokasional dan IPTA.

JAWAPAN

Tuan Yang di-Pertua,

Kementerian sentiasa memastikan kebajikan dan kesejahteraan pelajar di IPT terjaga, terutamanya kepada pelajar daripada keluarga B40 untuk mendapatkan akses internet dan mampu memiliki peranti bagi mengikuti sesi Pengajaran dan Pembelajaran (PdP) secara dalam talian.

Bagi membantu pelajar IPT termasuk daripada kalangan pelajar B40 mengikuti sesi Pengajaran dan Pembelajaran (PdP) mereka secara dalam talian dengan baik, Kementerian dengan kerjasama Kementerian Komunikasi dan Multimedia Malaysia (KKMM) telah menyalurkan maklumat 871 lokasi kemudahan pusat internet di bawah seliaan KKMM kepada universiti-universiti awam. Pusat-pusat internet ini boleh diakses oleh semua pelajar di kawasan bandar dan luar bandar seluruh Malaysia termasuk di Sabah dan Sarawak.

Selain itu, Kementerian juga menyediakan bantuan berbentuk sumbangan pelan data bagi capaian internet kepada 320,396 pelajar daripada kalangan keluarga B40 di universiti awam. Seramai 225,784 pelajar telah dan akan menerima bantuan dalam bentuk simkad manakala 94,612 pelajar akan menerima bantuan sama ada berbentuk tunai pembelian pelan data mengikut syarikat telekomunikasi pilihan masing-masing. Bantuan ini dibiayai melalui sumber dana dalaman universiti awam dan tabung kebajikan pelajar dengan anggaran peruntukan keseluruhan berjumlah RM24 juta.

Selain bantuan dan sumbangan dalam bentuk pelan data, kementerian turut menyediakan bantuan berbentuk pembiayaan kepada 8,965 pelajar daripada kalangan keluarga B40 untuk memiliki peranti. Daripada jumlah tersebut, seramai 5,965 pelajar akan menerima sumbangan berbentuk komputer riba, 300 pelajar menerima bantuan berbentuk pinjaman kewangan untuk pembelian komputer dan selebihnya 2,700 pelajar menerima bantuan berbentuk tunai bagi tujuan pembelian peranti. Bantuan ini dibiayai melalui sumber dana universiti awam sendiri; tabung kebajikan pelajar; zakat daripada Tabung Haji; wakaf; dan

sumbangan daripada agensi dan pihak lain dengan anggaran peruntukan sebanyak RM13.4 juta.

Kementerian turut menawarkan pemberian bantuan tunai sebanyak RM50 seorang kepada 76,153 pelajar baharu bagi Sesi Akademik 2020/2021 bagi meringankan beban kos yang perlu ditanggung oleh mereka untuk mengikuti PdP secara dalam talian. Bantuan ini melibatkan peruntukan berjumlah RM3.8 juta.

Kementerian dengan kerjasama Yayasan Sukarelawan Siswa (YSS) juga telah melancarkan inisiatif dengan izin *crowdfunding* melalui Tabung Prihatin Siswa. Inisiatif ini mengajak pihak luar untuk turut sama menyalurkan sumbangan bagi membantu meringankan kesulitan pelajar yang berkeperluan dalam meneruskan sesi PdP mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]
TARIKH : 10 NOVEMBER 2020 (SELASA)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI KEWANGAN** menyatakan jelaskan apakah kewajaran Khazanah Nasional Berhad meluluskan penggabungan UEM Sunrise, anak syarikat UEM Group Berhad dengan Eco World Development Group Berhad, yang dikatakan 'bail out' untuk syarikat swasta menggunakan dana Kerajaan.

JAWAPAN

Tuan Yang di-Pertua,

Cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut.

Cadangan tersebut telah dikemukakan berdasarkan kepada manfaat komersil yang mampu diraih hasil daripada penggabungan tersebut. Cadangan penggabungan tersebut tidak melibatkan tunai tetapi transaksi pertukaran saham dan waran yang mampu mengukuhkan lagi kedudukan UEM Sunrise.

Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld, sekiranya kedua-dua syarikat ini bersetuju untuk memulakan perbincangan penggabungan selanjutnya.

Sebarang keputusan yang berkaitan dengan cadangan penggabungan ini adalah bersifat komersil dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN SABRI BIN AZIT [JERAI]

TARIKH : 10 NOVEMBER 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan asas kelewatan menyediakan peruntukan terhadap menaik taraf loji air (Rumah Pam) di Gurun dalam Parlimen Jerai.

JAWAPAN

Tuan Yang di-Pertua,

Untuk makluman Yang Berhormat, Kerajaan Persekutuan sentiasa bekerjasama dengan kerajaan Negeri terutamanya pihak berkuasa air negeri dalam usaha untuk meningkatkan liputan bekalan air kepada penduduk luar bandar.

Dalam hal ini, kesemua permohonan projek bekalan air luar bandar yang diterima Kementerian ini telah diperhalusi di peringkat negeri dan disusun mengikut keutamaan. Oleh yang demikian, sebarang permohonan boleh dikemukakan kepada Unit Perancang Negeri (UPEN) untuk disenaraikan di dalam senarai keutamaan negeri dan seterusnya dipanjangkan kepada Kementerian untuk pertimbangan selanjutnya.

Walau bagaimanapun, kelulusan projek-projek ini adalah tertakluk kepada keupayaan kewangan semasa Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 10 NOVEMBER 2020 (SELASA)

SOALAN

TUAN CHARLES ANTHONY SANTIAGO [KLANG] minta **MENTERI KEWANGAN** menyatakan kesediaan Kerajaan untuk mewujudkan 'Rental Relief Fund' bagi melindungi golongan B40 dan peniaga yang terjejas akibat impak ekonomi COVID-19 daripada pengusiran dari rumah atau premis disewa.

JAWAPAN

Tuan Yang di-Pertua,

Kerajaan telah mewartakan Akta Langkah-Langkah Sementara bagi Mengurangkan Kesan Penyakit Koronavirus 2019 (COVID-19) 2020 Akta 829 pada 23 Oktober 2020 yang lalu dimana Akta ini telah diluluskan di Dewan Rakyat pada 25 Ogos 2020 dan di Dewan Negara pada 22 September 2020. Untuk makluman Yang Berhormat, Akta ini merupakan satu platform yang memberi manfaat kepada individu dan syarikat yang terkesan dari aspek ekonomi khususnya akibat wabak COVID-19 merangkumi pihak yang mempunyai kontrak sewaan rumah, bangunan atau premis.

Melalui kaedah ini, pihak yang berkontrak sama ada individu atau peniaga sekiranya terdapat masalah berhubung sewaan mengikut perkara yang ditetapkan dalam kontrak, boleh menyelesaikan masalah ini secara baik melalui satu pusat yang dinamakan *COVID-19 Mediation Centre* atau Pusat Mediasi COVID-19 (PMC-19) tanpa melibatkan proses undang-undang di mahkamah. Pusat ini dikelolakan oleh Jabatan Perdana Menteri dan pembiayaan pusat ini akan ditanggung sepenuhnya oleh Kerajaan. Dengan inisiatif ini, Kerajaan akan sentiasa peka agar kebajikan rakyat dijaga secara holistik dari semasa ke semasa.